

詞

綜

冊

一



詞

綜



四部備要

集部

上海中華書局據原刻本

校刊

桐鄉 陸費達 總勘

杭縣 高時顯 輯校

杭縣 吳汝霖 校

丁輔之 監造

序

自有詩而長短句卽寓焉南風之操五子之歌是已
周之頌三十一篇長短句居十八漢郊祀歌十九篇
長短句居其五至短簫鏜歌十八篇篇皆長短句謂
非詞之源乎迄于六代江南採蓮諸曲去倚聲不遠
其不卽變爲詞者四聲猶未諧暢也自古詩變爲近
體而五七言絕句傳于伶官樂部長短句無所依則
不得不更爲詞當開元盛日王之渙高適王昌齡詩
句流播旗亭而李白菩薩蠻等詞亦被之歌曲古詩
之於樂府近體之於詞分鑣並騁非有先後謂詩降
爲詞以詞爲詩之餘殆非通論矣西蜀南唐而後作
者日盛宣和君臣轉相矜尚曲調愈多流派因之亦
別短長互見言情者或失之俚使事者或失之伉鄙
陽姜夔出句琢字鍊歸於醇雅於是史達祖高觀國
羽翼之張輯吳文英師之於前趙以夫蔣捷周密陳
允衡王沂孫張炎張翥效之於後譬之於樂舞箭至
於九變而詞之能事畢矣世之論詞者惟草堂是規
白石梅溪諸家或未闕其集輒高自矜詡予嘗病焉
顧未有以奪之也友人朱子錫鬯輯有唐以來迄於
元人所爲詞凡一十八卷目曰詞綜訪予梧桐鄉予

詞

綜序

覽而有契於心請雕刻以行朱子曰未也宋元詞集傳於今者計不下二百家吾之所見僅及其半而已子其博搜以輔吾不足然後可予曰唯唯錫鬯仍北遊京師南至於白下逾三年歸廣爲二十六卷子亦往來茗雪間從故藏書家抄白諸集相對參論復益以四卷凡三十卷計覽觀宋元詞集一百七十家傳記小說地志共三百餘家歷歲八稔然後成書庶幾可一洗草堂之陋而倚聲者知所宗矣若其論世而敘次詞人爵里勘讐同異而辨其譌則柯子寓匏周子青士力也

皆

康熙戊午嘉平之朔休陽

汪森書于裘杼樓

詞綜發凡

朱彝尊尊纂

唐宋以來作者長短句每別爲一編不入集中以是散佚最易常熟吳氏訥彙有宋元百家詞抄傳絕少未見全書近日毛氏晉刻有汲古閣六十家宋詞頗有裨于學者是編所錄半屬抄本白門則借之周上舍雪客黃徵士俞邨京師則借之宋員外牧仲成進士容若吳下則借之徐太史健庵里門則借之曹侍郎秋岳餘則汪子晉賢購諸吳興藏書家互爲參定其已經選輯者南唐二主詞集一卷馮延巳陽春錄一卷潘閬逍遙詞一卷林逋和靖先生集詞晏殊珠玉詞一卷歐陽修六一居士詞三卷王安石半山老人詞一卷晏幾道小山詞二卷張先子野詞一卷柳永樂章集九卷蘇軾東坡居士詞二卷黃庭堅琴趣外篇二卷秦觀淮海詞三卷晁補之詞一卷陳師道後山長短句二卷李之儀姑溪集詞二卷賀鑄東山寓聲樂府三卷毛滂東堂詞二卷杜安世詞一卷黃裳演山集詞二卷葛勝仲丹陽詞一卷周紫芝竹坡居士樂府三卷謝逸溪堂詞一卷謝薊竹友詞一卷葛郊信齋詞一卷廖行之省齋詩餘周邦彥清真集三卷

晁端禮閑齋琴趣外篇一卷徐仲青山樂府一卷
呂渭老詞一卷徐積節孝集附詞陳瓘了齋詞一
卷王安中初寮集詞一卷向子諲酒邊集四卷蔡
伸友古詞一卷王庭珪盧溪詞二卷葉夢得石林
詞一卷王之道相山居士詞二卷向鎬樂齋詞二
卷沈瀛竹齋詞一卷劉弇雲龍集詞一卷汪藻浮
溪文粹附詞趙師俠坦菴長短句一卷陳與義無
住詞一卷劉一止茗溪詞一卷趙長卿惜香樂府
十卷王灼頤堂詞一卷張綱華陽老人長短句岳
飛金陀粹編家集附詞張元幹蘆川詞一卷鄧肅
枏欄集詞一卷劉子翬屏山集附詞張掄蓮社詞
一卷朱敦儒樵歌三卷曾覲海野詞一卷楊無咎
逃禪詞三卷侯寘嬾窟詞一卷曾惇詞一卷朱雍
梅詞一卷辛棄疾稼軒樂府十二卷范成大石湖
詞一卷黃公度知稼翁詞一卷葛立方歸愚詞一
卷張孝祥于湖詞一卷程垓書舟雅詞二卷韓元
吉焦尾集詞一卷周必大近體樂府一卷倪偁綺
川詞一卷姚述堯簫臺公餘詞一卷京鏜松坡居
士樂府一卷朱熹晦庵詞一卷洪适盤洲集詞二
卷吳儆竹洲詞一卷楊萬里誠齋樂府一卷李處

全晦庵詞一卷丘壑文定公詞一卷羅願鄂州小
集附詞劉克莊後村別調一卷趙彥端介庵詞四
卷管鑑養拙堂詞一卷張鑑玉照堂詞一卷劉擬
招山集樂章程泌銘水集詞一卷王千秋審齋詞
一卷姜夔白石詞一卷陸游渭南集詞二卷陳亮
龍川集詞二卷劉過龍洲詞一卷楊炎西樵語業
一卷張輯東澤綺語債一卷謝懋靜寄居士樂章
二卷黃機竹齋詩餘一卷劉鎮隨如百詠吳禮之
順受老人詞五卷許棐梅屋詩餘一卷戴復古石
屏詞一卷毛开樵隱詞一卷洪咨夔平齋詞一卷
郭應祥笑笑詞一卷盧祖臯蒲江詞一卷高觀國
竹屋癡語一卷史達祖梅溪詞二卷汪莘方壺存
稿詞二卷吳潛履齋詩餘二卷李昂英文溪詞一
卷趙以夫虛齋樂府二卷陳經國龜峯詞一卷方
岳秋厓先生小稿詞四卷張榘芸窗詞一卷洪璚
空同詞一卷方千里和清真詞一卷楊澤民續和
清真詞一卷盧炳吐堂詞一卷沈端節克齋詞一
卷黃昇散花庵詞一卷嚴羽滄浪集附詞王以寧
詞一卷吳文英夢牕甲乙丙丁稿四卷蔣捷竹山
詞一卷陳允平日湖漁唱二卷周密草窗詞二卷

詞

綜 發凡

一一中華書局聚

王沂孫碧山樂府二卷張炎玉田詞二卷石孝友

金谷遺音一卷林正大風雅遺音四卷張矩梅淵

詞陳德武白雪遺音一卷文天祥文山集詞一卷

王鼎翁遺集附詞何夢桂潛齋詞一卷惠洪石門

文字禪附詞葛長庚海璠詞二卷李清照漱玉集

一卷朱淑真斷腸集一卷韓玉東浦詞一卷段克

己遜齋樂府一卷段成己菊軒樂府一卷元好問

遺山樂府二卷許衡魯齋集附詞程鉅夫雪樓集

詞一卷王惲秋澗集詞四卷趙孟頫松雪詞一卷

劉因樵庵詞一卷汪宗臣紫岩集附詞吳澄草廬

詞一卷虞集道園學古錄詞一卷宋娶燕石集詞

一卷劉詵桂隱集附詞曹伯啓漢泉漫稿詞一卷

許有壬圭塘小藁詞一卷薩都刺雁門集詞一卷

張翥蛻岩詞二卷袁易靜春詞一卷沈禧竹窗詞

一卷洪希文續軒渠集詞一卷張可久小山樂府

二卷喬吉惺惺老人樂府一卷張埜古山樂府一

卷倪瓚清閨閣詞一卷顧瑛玉山璞附詞陶宗儀

南村集附詞邵亨貞蛾術詞選四卷凌雲翰柘溪

集詞一卷王行半軒集詞一卷張雨貞居詞一卷

凡百六十餘家雖已覽觀未入選者楊杰無為集

徐經孫文惠集徐鹿卿清正集魏了翁鶴山詞王
義山稼軒類稿又順齋樂府虛靖真君詞洞玄珠
玉集凡八家

藏書家編目錄詞集多不見收惟莆田陳氏書錄解
題論其大略鄱陽馬氏采入通考志中所載晁冲
之具茨集王觀冠柳集趙令時聊復集蘇庠後湖
集万俟雅言大聲集陳克赤城詞康與之順菴樂
府趙鼎得全居士集劉光祖鶴林詞左譽筠菴長
短句姚寬西溪居士樂府蘇泂冷然閣集嚴仁清
江欵乃詞孫惟信花翁詞魏子敬詞王武子詞李
洪兄弟花萼集吳激東山集蔡松年蕭閑公集舊
本散失未經寓目或詩集雖在而詞則闕如僅於
選本中錄其一二至于汪元量水雲詞蔡桷浩歌
集黃人傑可軒曲林黃定鳳城詞曹冠燕喜集馬
寧祖退圃詞吳鎰敬齋詞袁去華詞侯延慶退齋
詞黃談淵壑詞林淳定齋詩餘鄧元漫堂集王大
受近情集張孝忠野適堂詞劉德秀默軒詞鍾將
之岫雲詞徐得之西園鼓吹李叔猷東老詞方信
儒好菴游戲陳從古洮湖詞韓子耕蕭閒詞隻字
未見此外軼者尚多海內收藏之家或有存本倘

許借觀願仿曾氏雅詞之例別為拾遺附于卷末
世人言詞必稱北宋然詞至南宋始極其工至宋季
而始極其變姜堯章氏最為傑出惜乎白石樂府
五卷今僅存二十餘闋也東澤綺語傳亦寥寥至
施乘之孫季蕃盛以詞鳴沈伯時樂府指迷亦為
矜譽今求其集不可復覩周公謹陳君衡王聖與
集雖抄傳公謹賦西湖十景當日屬和者甚衆而
今集無之花草粹編載有君衡二詞陸輔之詞旨
載有聖與霜天曉角等調中語均今集所無至張
叔夏詞集晉賢所購合之牧仲員外雪客上舍所
抄暨常熟吳氏百家詞本較對無異以為完書頃
吳門錢進士宮聲相遇都亭謂家有藏本乃陶南
村手書多至三百闋則予所見猶未及半漏萬之
譏殆不免矣

古詞選本若家宴集謫仙集蘭畹集復雅歌辭類分
樂章羣公詩餘後編五十大曲萬曲類編及草牕
周氏選皆軼不傳獨草堂詩餘所收最下最傳三
百年來學者守為兔園冊無惑乎詞之不振也是
集兼采趙弘基花間集黃昇花庵絕妙詞中興以
來絕妙詞陳景沂全芳備祖樂府元好問中州樂

府彭致中鳴鶴餘音鳳林書院元詞樂府補題許
有孚主塘欵乃集顧梧芳尊前集楊慎詞林萬選
陳耀文花草粹編沈際飛草堂詩餘廣集茅映詞
的卓人月詞統諸書務去陳言歸于正始至如曾
慥樂府雅詞天機餘錦采入花草粹編趙粹夫陽
春白雪集見李開先小山樂府後序則諸書嘉隆
間猶未散軼而天機碎錦片玉珠璣二集聞江都
藏書家有之又如百一選曲太平樂府詩酒餘音
仙音妙選樂府新聲樂府羣珠樂府羣玉曲海之
內定有詞章可采惜俱未之見也

向客太原見晉祠石刻多北宋人唱和詞而平遙縣
治西古寺廡下有金人所作小令勒石嵌壁令工
人搨回經十餘年簡之故篋則已爲鼠嚙盡是集
成未克採入深以爲恨計海內名山苔龕石壁宋
元人留題長短句尚多好事君子惠我片楮無異
雙金也

詞有當時盛傳久而翻逸者遺珠片玉往往見于稗
官載紀是編自百川學海古今小說唐宋叢書曾
氏類說吳氏能改齋漫錄阮氏詩話總龜胡氏茗
溪漁隱叢話陶氏說郭商氏裨海陸氏說海陳氏

祕笈外繙閱小說又不下數十家片詞足采輒事
筆疏故多他選未見之作庶幾一開生面佐予討
論編纂者汪子而外則安丘曹舍人升六無錫嚴
徵士蓀友江都汪舍人季舟宜興陳徵士其年華
亭錢舍人葆翻吳江俞處士無殊休寧汪上舍周
士季青錢塘龔主事天石同郡俞處士右吉沈上
舍融谷繆處士天自沈布衣覃九葉舍人元禮李
徵士武曾布衣分虎沈秀才山子柯孝廉翰周浦
布衣傅功暨門人周濤岳也鏤版未竟而錢葉二
君相繼奄逝可爲泫然

詞人姓氏爵重選家書法不一先系爵後書名者花
間集中州樂府體也書字於官爵下者絕妙詞選
體也書名者全芳備祖體也書字者草堂體也冠
別字於姓名之前者鳳林書院體也至楊氏詞林
萬選陳氏花草粹編或書名或書字或書別字或
書官或書集覽者茫然莫究其世次甚有別本以
朱三十五樵歌爲秋娘作者良可大噓是集考之
正史參以地志傳紀小說以集歸人以字歸名得
十之八九論世之功柯子寓匏有焉

周布衣青士隱於塵市於書無所不闕辨證古今字

句音韻之譌輒極精當是集藉其校讎如史梅溪綺羅香後闋還被春潮晚急原係六字爲句草堂坊本脫去晚字諸本因之周晴川十六字令眠月影穿窗白玉錢原係眠字爲句選本譌作明字遂以明月影爲句歐陽永叔越溪春結語沉麝不燒金鴨玲瓏月照梨花並係六字句坊本譌玲爲冷瓏爲籠遂以七字五字爲句德祐太學生祝英臺近那人何處怎知道愁來不去譌不爲又一字之乖全旨皆失今悉爲改正他如蘇子瞻念奴嬌則從容齋隨筆汪彥章點絳唇則從能改齋漫錄王晉卿燭影搖紅則從漫錄去其前闋李后主臨江仙則從者舊續聞補其結語其餘糾定難更僕數坊間雖有圖譜倚聲者宜攷質焉

四聲二十八調各有其倫柳屯田樂章集有同一曲名字數長短不齊分入各調者姜石帚湘月詞注云此念奴嬌之鬲指聲也則曲同字數同而湘月念奴嬌調實不同合之爲一非矣詞固有一曲而各異其名者是選悉依集本不敢更易審音者度無勿知似不必比而同之也

張子野弔林君復詩烟雨詞亡草更青蔡君謨寄李

良定詩多麗新詞到海邊一篇之工見之吟咏山
抹微雲秦學士露華倒影柳屯田曉風殘月柳三
變滴粉搓酥左與言一句之工形諸口號當日風
尚所存甄藻自爾不爽故是集多綴宋元人評語
有明用脩元美諸家品隲容有未當或置不錄焉
宣政而後士大夫爭爲獻壽之詞聯篇累牘殊無意
味至魏華父則非此不作矣是集于千百之中止
存一二雖華甫亦置不錄也

元人小曲如乾荷葉天淨沙凭欄人平湖樂一名小
桃紅等調平上去三聲並用往往編入詞集然按
之宋詞如戚氏西江月換巢鸞鳳少年心惜分釵
漁家傲杜安世集中體諸闕已爲曲韻濫觴矣是
集間有采錄蓋倣楊氏詞林萬選之例覽者幸勿
以詞曲混一爲訕

言情之作易流於穢此宋人選詞多以雅爲目法秀
道人語涪翁曰作艷詞當墮犁舌地獄正指涪翁
一等體製而言耳填詞最雅無過石帚草堂詩餘
不登其隻字見胡浩立春吉席之作蜜殊咏桂之
章亟收卷中可謂無目者也甚而易靜兵要寓聲
于望江南張用成悟真篇按調爲西江月詞至此

亦不幸極矣是集於黃九之作去取特嚴不敢曲
狗後山之說

宋人編集歌詞長者曰慢短者曰令初無中調長調
之目自顧從敬編草堂詞以臆見分之後遂相沿
殊屬牽率歲在癸丑舍館京師宣武門右與葆翻
舍人戶庭相望予輯是書葆翻輯詞曠辨晰體製
以字數多寡爲先後最爲精密計一千調編爲三
十卷比年聞更增益予所見鳴鶴餘音洞玄金玉
集及他抄本曲調異同詞曠未經采入者約又百
餘惜未遑郵寄今葆翻逝矣遺書在笥雕刻無期
誠倚聲家之闕事也

花間體製調卽是題如女冠子則詠女道士河瀆神
則爲送迎神曲虞美人則詠虞姬是也宋人詞集
大約無題自花庵草堂增入閨情閨思四時景等
題深爲可憎今俱準集本刪去

明初作手若楊孟載高季迪劉伯溫輩皆溫雅芊麗
咀宮含商李昌祺王達善瞿宗吉之流亦能接武
至錢唐馬浩瀾以詞名東南陳言穢語俗氣薰入
骨髓殆不可醫周白川夏公謹諸老間有硬語楊
用修王元美則強作解事均與樂章未諧然二百

年中豈無合作當遍搜文集發其幽光編爲二集
繼是編之後

古今詞話一書博訪未得詞人瑣事散見各家詩話
及傳記小說中掇拾需時是集未能附綴將仿孟
榮本事詩計敏夫唐詩紀事別爲一集以資談柄
近吳江徐徵士電發著詞苑叢譚一書可云先獲
我心當讓其單行矣

詞綜發凡

詞綜總目

詞綜 唐五代十國宋金元詞三十卷 補入三
卷 補詞三卷 續補入二卷

明詞綜十二卷

國朝詞綜四十八卷

共九十八卷

詞綜總目

秀水 朱彝尊 抄撮

休寧 汪森 增定

嘉善 柯崇樸 編次

嘉興 周箕 辨譌

卷一 唐詞六十八首

卷二 五代十國詞七十二首

卷三 五代十國詞七十六首

卷四 宋詞六十七首

卷五 宋詞七十首

卷六 宋詞六十四首

卷七 宋詞六十二首

卷八 宋詞六十首

卷九 宋詞五十六首

卷十 宋詞六十一首

卷十一 宋詞六十四首

卷十二 宋詞六十三首

卷十三 宋詞六十八首

卷十四 宋詞六十八首

卷十五 宋詞六十六首

詞

綜總目

卷十六 宋詞六十一首

卷十七 宋詞六十首

卷十八 宋詞六十二首

卷十九 宋詞六十六首

卷二十 宋詞七十六首

卷二十一 宋詞七十首

卷二十二 宋詞五十二首

卷二十三 宋詞五十一首

卷二十四 宋詞七十首

卷二十五 宋詞五十首

卷二十六 金詞六十二首

卷二十七 元詞五十三首

卷二十八 元詞五十四首

卷二十九 元詞五十二首

卷三十 元詞五十八首

補遺

卷三十一 補人詞六十九首

卷三十二 補人詞六十八首

卷三十三 補人詞六十七首

卷三十四 補詞五十七首

卷三十五 補詞五十五首
卷三十六 補詞五十四首

詞綜總目

詞

綜總目

卷一

昭宗皇帝

李白

張志和

韋應物

戴叔倫

王建

韓翃

白居易

劉禹錫

溫庭筠

皇甫松

鄭符

段成式

司空圖

韓偓

張曙

呂嵒

柳氏

王麗真

無名氏

卷二

後唐莊宗

蜀主王衍

蜀主孟昶

南唐中宗李景

南唐後主李煜

和凝

韋莊

薛昭蘊

牛嶠

毛文錫

牛希濟

歐陽炯

卷三

顧夔

鹿虔扈

閻選

魏承班

尹鶚

毛熙震

李珣

孫光憲

張泌

馮延巳

成幼文

耿玉真

卷四

徽宗皇帝

高宗皇帝

徐昌圖

潘閔

夏竦

寇準

王禹偁

錢惟演

晏殊

賈昌朝

王琪

林逋

李遵勛

葉清臣

聶冠卿

李師中

韓琦

范仲淹

宋祁

鄭獬

韓縝

張昇

謝絳

歐陽脩

梅堯臣

石延年

司馬光

王安石

范純仁

卷五

晏幾道

張先

柳永

卷六

蘇軾

黃庭堅

秦觀

晁補之

張耒

陳師道

李豸

李之儀

卷七

賀鑄

毛滂

王仲

杜安世

李元膺

孫洙

朱服

章棗

舒亶

李清臣

王詵

趙令時

王安禮

王安國

曾肇

晁冲之

秦觀

王觀

卷八

孔平仲

米芾

滕宗諒

鄭僅

黃裳

張景修

孫臏

程過

解昉

陳亞

張舜民

王雱

蔡挺

汪輔之

蘇庠

劉涇

潘元質

蘇過

秦湛

許庭

葛勝仲

李冠

張表臣

查荃

周紫芝

謝逸

謝邁

葛郊

趙鼎臣

廖行之

卷九

周邦彥

晁端禮

田不伐

曹組

万俟雅言

徐伸

卷十

陳克

李祁

呂渭老

趙企

李持正

王采

韓駒

徐積

何籀

蔣子雲

宋齊愈

李甲

夏倪

沈會宗

廖世美

林少瞻

何大圭

沈公述

魯逸仲

何棗

陳瓘

王安中

楊适

方喬

李玉

波子山

謝克家

卷十一

向子諲

蔡伸

王庭珪

葉夢得

王之道

向鏞

沈瀛

李邴

劉弁

汪藻

曾紆

徐俯

趙師依 陳與義 劉一止 趙長卿

王灼 張綱 陳濟翁

卷十二

趙鼎 岳飛 李彌遜 朱翌

張元幹 洪皓 呂本中

劉子翬 張掄 朱敦儒 鄧肅 康與之

吳億 曾覲 閻蒼舒 左譽

陸凝之 楊无咎 阮閱 侯寘

曾慥 曾惇 朱雍 姚進道

卷十三

劉之翰 江緯 黃公度 葛立方

辛棄疾 范成大 程垓

卷十四

張孝祥 姚寬 程垓

韓元吉 周必大 京鏜 尤袤

仲并 朱熹 真德秀 趙汝愚

洪适 吳儆 楊萬里 李處全

張震 羅願 崔與之 劉克莊

樓鏗 吳琚 趙彥端 管鑑

魏子敬 甄龍友 俞國寶 衛元卿

李石

張鑑

杜旃

劉儼

岳珂

程秘

王千秋

程先

蘇洵

劉圻父

卷十五

姜夔

陸游

陳亮

劉過

楊炎

張輯

卷十六

謝懋

黃機

劉鎮

危稹

吳禮之

劉光祖

閻邱次杲

馬莊父

李洪

李泳

李漳

李浙

鄭域

戴復古

黃銖

嚴仁

易祓

趙善扛

毛开

王壘

曹幽

洪咨夔

趙汝迂

章穎

郭應祥

陸淞

卷十七

盧祖皋

高觀國

史達祖

卷十八

汪莘

吳潛

李昂英

史雋之

章謙亨

趙以夫

陳經國

方岳

張榘

洪琛

方千里

汪暉

尹煥

馮取洽

陳以莊

盧炳

沈端節

潘勃

馮艾子

黃昇

文及翁

李芸子

嚴羽

李廷忠

王以寧

卷十九

吳文英

蔣捷

卷二十

陳允平

周密

卷二十一

王沂孫

張炎

卷二十二

石孝友

孫惟信

劉褒

張槃

潘希白

湯恢

張矩

趙耆孫

翁元龍

李肩吾

毛翊

康仲伯

覃懷高

趙旭

樓扶

楊彥齡

李珣

方有聞

陳德武

汪公澤

周格非

陳襲善

丁義叟

呂直夫

王武子

趙君舉

王文甫

施芸隱

鄭覺齋

王月山

房舜卿

林正大

薛夢桂

曾揆

黃孝邁

江開

卷二十三

文天祥

鄧剡

王鼎翁

何夢桂

李南金

莫崙

徐一初

劉辰翁

黃公紹

李萊老

李彭老

王易簡

馮應瑞

唐藝孫

呂同老

練恕可

趙汝鈞

唐珏

李居仁

王夢應

譚宣子

陳逢辰

樓采

奚滅

趙聞禮

卷二十四

寇寺丞

陳參政

杜郎中

德祐太學生

無名氏

裴湘

僧揮

祖可

惠洪

上清蔡真人

于真人

葛長庚

虬仙

卷二十五

盧氏

舒氏

魏夫人

延安夫人

李清照

阮逸女

幼卿

吳淑姬

朱淑真

蔣興祖女

鄭意娘

慕容崑卿妻

美奴

孫道綯

鄭文妻

陸游妾

金德淑

王清惠

徐君寶妻

琴操

盼盼

聶勝瓊

蜀中妓

玉英

吳城小龍女

赤城韓夫人

衛芳華

紫姑

卷二十六

完顏璫

蔡松年

吳激

劉仲尹

高士談

王庭筠

趙可

劉迎

王特起

韓玉

趙秉文

高憲

党懷英

王渥

景覃

王礪

趙擴

折元禮

劉著

李獻能

李晏

高永

段克己

段成己

元好問

王予可

鄧千江

卷二十七

許衡

張弘範

劉秉忠

燕公楠

程鉅夫

盧摯

劉敏中

楊果

仇遠

李冶

王恽

趙孟頫

劉因

梁曾

陳孚

汪宗臣

姚雲文

詹正

吳澄

彭元遜

羅志仁

韋居安

卷二十八

李琳

趙文

宋遠

周景

劉將孫

蕭列

司馬昂父

應法孫

王學文

彭芳遠

危復之

顏子俞

劉景翔

吳元可

劉鉉

蕭允之

黃子行

彭履道

李裕翁

段弘章

劉天迪

周伯陽

尹公遠

曾允元

李天驥

劉應幾

周孚先

尹濟翁

王從叔

蕭漢傑

彭泰翁

趙功可

戴山隱

姜个翁

卷二十九

虞集

鮮于樞

宋娶

劉詵

曹伯啓

許有壬

許有孚

馬熙

許楨

薩都刺

張翥

袁易

沈禧

洪希文

楊立齋

卷三十

張埜

吳鎮

倪瓚

顧德輝

陶宗儀

汪斌

邵亨貞

沈景高

羅慶

唐桂芳

凌雲翰

王行

楊樵雲

周晴川

張半湖

蕭東父

黃水邨

傅按察

無名氏

張雨

滕賓

劉燕哥

陳鳳儀

卷三十一 補人

珍做宋版印

蘇舜欽

韓維

韋驥

劉燾

歐陽澈

胡舜陟

胡仔

倪偁

王十朋

洪邁

姚述堯

湯思退

魏杞

牟獻

王自中

邱壻

姜特立

蔡柎

張履信

王岵

韓 轆

姚鏞

羅椅

楊伯崑

周 晉

楊纘

翁孟寅

趙汝芑

馮去非

許 棐

陸 叡

蕭泰來

趙希邁

趙崇礪

趙希彭

王 藻

趙與鈞

樓 槃

鍾 過

黃 蘭

陳 策

李振祖

卷三十二

汪元量

施 岳

張 樞

李 演

丁 宥

史介翁

周端臣

何光大

趙 潛

劉 瀾

張龍榮

王億之

余桂英

胡仲弓

尚希尹

柴 望

朱 藻

黃 鑄

王同祖

王茂孫

張 桂

張 林

朱鼎孫

吳大有

趙崇霄

范希文

鄭斗煥

曹良史

趙與仁 王 弈

湯彌昌

趙必瓌

陳紀 楊澤民 陳先

陳從古

束從周

李震 李銓

陳從古

鄭子玉

章麗真 袁正真

卷三十三

耶律楚材

李俊民

馮子振

白無咎

許謙

張可久

喬吉

何繼高

陳深

趙雍

王璉

歐陽玄

孟昉

舒頔

舒遜

劉忠之

何可視

袁華

于立

陸仁

張遜

石民瞻

鄭韶

柯九思

王逢

何景福

錢抱素

吳瓘

錢應庚

王蒙

陸祖先

王燧

張翥

金綱

王容谿

夢庵

無名氏

管道昇

卷三十四 補詞

謝絳

晏幾道

張先

晁補之

賀鑄

舒亶

王詵

周紫芝

晁端禮

万俟雅言

呂渭老

趙鼎

李彌遜

朱翌

張元幹

劉子翬

張掄

朱敦儒

侯寘

辛棄疾

卷三十五

程垓

韓元吉

京鏗

劉克莊

吳玘

趙彥端

管鑑

劉擬

姜夔

陸游

劉過

張輯

謝懋

黃機

馬莊父

李泳

戴復古

盧祖皋

吳潛

汪莘

李昂英

趙以夫

黃昇

吳文英

陳允平

周密

王沂孫

卷三十六

張炎

張榘

湯恢

翁元龍

樓扶

莫崱

李萊老

李彭老

王易簡

葛長庚

完顏璫

段克己

段成己

元好問

劉因

仇遠

虞集

宋駉

薩都刺

倪瓚

顧瑛

陶宗儀

唐桂芳

張雨

卷三十七續補入

吳則禮

李呂

李光

潘良貴

胡銓

程大昌

楊冠卿

曹冠

韓泐

魏了翁

王邁

劉學箕

衛宗武

趙磻老

陳 著

卷三十八

袁去華

黎廷瑞

李好古

張真人

松菊道人

張伯淳

朱晞顏

姚 燧

王 結

陳 櫟

陸文圭

吳 存

張仲仁

詞綜卷一

唐詞六十八首

昭宗皇帝二首

李 白五首

張志和二首

韋應物一首

戴叔倫一首

王 建二首

韓 翃一首

白居易五首

劉禹錫二首

溫庭筠三十三首

皇甫松五首

鄭 符一首

段成式一首

司空圖一首

韓 偓一首

張 曙一首

呂 崑一首

柳 氏一首

王麗真一首

無名氏一首

昭宗皇帝

巫山一段雲題寶雞驛壁

蝶舞梨園雪鶯啼柳帶烟小池殘日豔陽天芋蘿山

又山 青鳥不來愁絕忍看鴛鴦雙結春風一等少

年心閑情恨不禁

菩薩蠻登華州城樓

登樓遙望秦宮殿茫茫只見雙飛燕渭水一條流千

山與萬丘 遠烟籠碧樹陌上行人去安得有英雄

迎歸大內中唐詩紀事作何處是英雄迎儂歸故宮
按尉遲偓中朝故事云乾寧三年李茂貞犯闕帝
次華州韓建迎歸郡中帝鬱鬱不樂每登城西齊雲
樓遠望明年秋製此詞云

李 白字太白蜀人一云山東人供奉翰林

菩薩蠻

平林漠漠烟如織寒山一帶傷心碧暝色入高樓有
人樓上愁 玉階一作闌干空佇立宿鳥歸飛急何
處是歸程長亭更一作連短亭湘山野錄云此詞不
知何人寫在鼎州滄水驛樓復不知何人所撰魏道
輔泰見而愛之後至長沙得古風集於曾子宣內翰
家乃知李白所撰

憶秦娥

簫聲咽秦娥夢斷秦樓月秦樓月年年柳色灞陵傷
別 樂游原上清秋節咸陽古道音塵絕音塵絕西
風殘照漢家陵闕

清平樂令

禁闈秋夜月探金窗罅玉帳鴛鴦噴蘭麝時落銀燈
香炷 女伴莫話孤眠六宮羅綺三千一笑皆生百
媚宸遊教在誰邊

桂殿秋

仙女下董雙成漢殿夜涼吹玉笙曲終却從仙官去
萬戶千門惟月明

又

河漢女玉鍊顏雲駟往往在人間九霄有路去無跡
裊裊香風生珮環吳虎臣云此太白詞也有得于石
刻而無其腔劉無言倚其聲歌之音極清雅

張志和字子同金華人擢明經肅宗命待詔翰林

坐貶不復仕自稱烟波釣徒

漁歌子

西塞山前白鷺飛桃花流水鱖魚肥青蒨笠綠蓑衣
斜風細雨不須歸黃魯直云有遠韻

又

松江蟹舍主人歡菰飯蓴羹亦共餐楓葉落荻花乾
醉宿漁舟不覺寒

韋應物京兆人官左司郎中歷蘇州刺史

調笑

河漢河漢曉挂秋城漫漫愁人起望相思塞北江南
別離離別離別河漢雖同路絕

戴叔倫字幼公金壇人官撫州刺史封譙縣男遷

轉應詞

邊草邊草邊草盡來兵老山南山北雪晴千里萬里
月明明月明月□笳一聲愁絕

王建字仲初潁州人大曆十年進士太和中為

陝州司馬

調笑

團扇團扇美人並來遮面玉顏憔悴三年誰復商量
管絃管絃管絃管春草昭陽路斷

又

蝴蝶蝴蝶飛上金枝玉葉君前對舞春風百葉桃花
樹紅紅樹紅樹燕語鶯啼日暮

韓翃字君平南陽人天寶十三載進士以駕部

郎中知制誥終中書舍人

章臺柳寄柳氏

章臺柳章臺柳往日依依一作青青今在否縱使長
條似舊垂也應攀折他人手

白居易字樂天其先太原人徙下邳貞元十四年

進士歷官中書舍人出知杭州以刑部尚

書致仕卒贈僕射謚文有長慶集

花非花

花非花霧非霧夜半來天明去來如春夢不多時去
似朝雲無覓處

憶江南

江南好風景舊曾諳日出江花紅勝火春來江水綠
如藍能不憶江南

又

江南憶最憶是杭州山寺月中尋桂子郡亭枕上看
潮頭何日更重遊

又

江南憶其次憶吳宮吳酒一杯春竹葉吳娃雙舞醉
芙蓉早晚得相逢

長相思

深畫眉淺畫眉蟬鬢鬢鬢鬢雲滿衣陽臺行雨迴 巫
山高巫山低暮雨瀟瀟郎不歸空房獨守時

劉禹錫字夢得中山人貞元中進士仕為太子賓

客會昌中檢校禮部尚書

春去也

春去也多謝洛城人弱柳從風疑舉袂叢蘭裊露似
沾巾獨坐亦含嚔

瀟湘神

斑竹枝斑竹枝淚痕點點寄相思楚客欲聽瑤瑟怨
瀟湘深夜月明時

温庭筠

本名岐字飛卿太原人官方山尉有握蘭
金荃等集

黄叔暘云飛卿詞極流麗宜為花間集之
冠

菩薩蠻

小山重疊金明滅鬢雲欲度香頰雪
懶起畫蛾眉弄妝梳洗遲
照花前後鏡花面交相映
新帖繡羅襦
雙雙金鷓鴣

又

水精簾裏頗黎枕暖香惹夢鴛鴦錦
江上柳如烟鴈飛殘月天
藕絲秋色淺人勝參差剪
雙鬢隔香紅玉釵頭上風

又

玉樓明月長相憶柳絲裊娜春無力
門外草萋萋送君聞馬嘶
畫羅金翡翠香燭銷成淚
花落子規啼綠窗殘夢迷

又

牡丹花謝鶯聲歇綠楊滿院中庭月相憶夢難成背
窗燈半明 翠鈿金壓臉寂寞香閨掩人遠淚闌干
燕飛春又殘

又

滿宮明月梨花白故人萬里關山隔金鴈一雙飛淚
痕沾繡衣 小園芳草綠家住越溪曲楊柳色依依
燕歸君不歸

又

寶函鈿雀金鸚鵡沉香閣上吳山碧楊柳又如絲驛
橋春雨時 畫樓音信斷芳草江南岸鸞鏡與花枝
此情誰得知

又

竹風輕動庭除冷珠簾月上玲瓏影山枕隱濃妝綠
檀金鳳凰 兩蛾愁黛淺故國吳宮遠春恨正關情
畫樓殘點聲

更漏子

柳絲長春雨細花外漏聲迢遞驚塞鴈起城烏畫屏
金鷓鴣 香霧薄透簾幕惆悵謝家池閣紅燭背繡
簾垂夢長君不知

又

星斗稀鐘鼓歇簾外曉鶯殘月蘭露重柳風斜滿庭
堆落花 虛閣上倚闌望還似去年惆悵春欲暮思
無窮舊歡如夢中

又

玉爐香紅蠟淚偏照畫堂秋思眉翠薄鬢雲殘夜長
衾枕寒 梧桐樹三更雨不道離情正苦一葉葉一
聲聲空階滴到明胡元任云庭筠工於造語極爲奇
麗此詞尤佳

歸國遙

香玉翠鳳寶釵垂冪冪鈿筐交勝金粟越羅春水綠
畫堂照簾殘燭夢餘更漏促謝娘無限心曲曉屏

山斷續

又

雙臉小鳳戰篔金颯豔舞衣無力風斂藕絲秋色染
錦帳繡幃斜掩露珠清曉簟粉心黃藥花靨黛眉
山雨點

酒泉子

楚女不歸樓枕小河春水月孤明風又起杏花稀
玉釵斜篸雲鬢重裙上鏤金雙鳳八行書千里夢鴈
南飛

南歌子

手裏金鸚鵡胸前繡鳳凰偷眼暗形相不如從嫁與
作鴛鴦

又

似帶如絲柳團酥握雪花簾卷玉鈎斜九衢塵欲暮
逐香車

又

倭墮低梳髻連娟細掃眉終日兩相思爲君憔悴盡
百花時

又

轉盼如波眼娉婷似柳腰花裏暗相招憶君腸欲斷
恨春宵

又

懶拂鴛鴦枕休縫翡翠裙羅帳罷爐薰近來心更切
爲思君

河瀆神

河上望叢祠廟前春雨來時楚山無限鳥飛遲蘭棹
空傷別離何處杜鵑啼不歇豔紅開盡如血蟬鬢
美人愁絕百花芳草佳節

又

孤廟對寒潮西陵風雨蕭蕭謝娘惆悵倚蘭橈淚流
玉筍千條 暮天愁聽思歸樂早梅香滿山郭回首
兩情蕭索離魂何處飄泊

女冠子

含嬌含笑宿翠殘紅窈窕鬢如蟬寒玉簪秋水輕紗
卷碧烟 雪胸鸞鏡裏琪樹鳳樓前寄語青娥伴早
求仙

玉蝴蝶

秋風淒切傷離行客未歸時塞外草先衰江南鴈到
遲 芙蓉凋嫩臉楊柳墮新眉搖落使人悲斷腸誰
得知

清平樂

洛陽愁絕楊柳花飄雪終日行人爭攀折橋下水流
嗚咽 上馬爭勸離觴南浦鶯聲斷腸愁殺平原年
少回首揮淚千行

還方怨

憑繡檻解羅幃未得君書腸斷瀟湘春鴈飛不知征
馬幾時歸海棠花謝也雨霏霏

訴衷情

鶯語花舞春晝午雨霏微金帶枕宮錦鳳凰帷柳弱

燕交飛依依遼陽音信稀夢中歸

思帝鄉

花花滿枝紅似霞羅袖畫簾腸斷卓香車迴面共人
閑語戰篋金鳳斜惟有阮郎春盡不歸家

夢江南

梳洗罷獨倚望江樓過盡千帆皆不是斜暉脉脉水
悠悠腸斷白蘋洲

河傳

江畔相喚曉妝鮮仙景箇女采蓮請君莫向那岸邊
少年好花新滿船紅袖搖曳逐風軟垂玉腕腸向
柳絲斷浦南歸浦北歸莫知晚來人已稀

又

湖上閑望雨蕭蕭烟浦花橋路遙謝娘翠蛾愁不銷
終朝夢魂迷晚潮蕩子天涯歸棹遠春已晚鶯語
空腸斷若耶溪溪水西柳堤不聞郎馬嘶

蕃女怨

萬枝香雪開已遍細雨雙燕鈿蟬箏金雀扇畫梁相
見鴈門消息不歸來又飛迴

又

磧南沙上驚鴈起飛雪千里玉連環金鏃箭年年征

戰畫樓離恨錦屏空杏花紅

荷葉杯

鏡水夜來秋月如雪采蓮時小娘紅粉對寒浪惆悵
正思惟一作相思

又

楚女欲歸南浦朝雨濕愁紅小船搖漾入花裏波起

隔西風

皇甫松字子奇湜之子

天仙子

晴野鷺鷥飛一隻水蒨花發秋江碧劉郎此日別天
仙登綺席淚珠滴十二晚峯青一作高歷歷

又

躑躅花開紅照水鷓鴣飛遶青山鶯行人經歲始歸
來千萬里錯相倚懊惱天仙應有以

摘得新

酌一卮須教玉笛吹錦筵紅蠟燭莫來遲繁紅一夜
經風雨是空枝

夢江南

蘭燼落屏上暗紅蕉閑夢江南梅熟日夜船吹笛雨
蕭蕭人語驛邊橋

又

樓上寢殘月下簾旌夢見秣陵惆悵事桃花柳絮滿
江城雙髻坐吹笙

鄭符字夢復官秘書監

閑中好題永壽寺

閑中好盡日松為侶此趣人不知輕風度僧語
段成式字柸古文昌子會昌中官太常少卿

閑中好

閑中好塵務不縈心坐對當窗木看移三面陰

司空圖

字表聖泗州人咸通中進士官禮部員外

郎黃巢之亂避地中條山昭宗反正以戶

部侍郎召至京復歸再以兵部侍郎召不

赴有一鳴集

酒泉子

買得杏花十載歸來方始拆假山西畔藥欄東滿枝

紅旋開旋落旋成空白髮多情入更惜黃昏把酒

祝東風且從容

韓

偓字致堯一作光萬年人龍紀中進士累官

兵部侍郎朱全忠惡之貶濮州司馬有香

奩集

生查子

侍女動妝奩故故驚人睡那知本未眠背面偷垂淚
懶卸鳳凰釵羞入鴛鴦被時復見殘燈和煙墜金
穗

張曙小字阿灰侍郎禕子

浣溪沙

枕障薰爐隔繡帷二年終日兩相思杏花明月始應
知天上人間何處去舊歡新夢覺來時黃昏微雨
畫簾垂

呂崑字洞賓關右人咸通中舉進士不第攜家

隱終南

梧桐影 景德寺僧房

落日斜秋風冷今夜故人來不來教人立盡梧桐影
按別本首句皆作落月斜非是今從竹坡詩話更正
又景德寺蛾眉院壁所題今夜故人作幽人今夜

柳氏韓翃寵姬

楊柳枝 答韓員外

楊柳枝芳菲節可恨年年贈離別一葉隨風忽報秋
縱使君來豈堪折

王麗真女郎見才鬼錄

字字雙

牀頭錦衾斑復斑
架上朱衣殷復殷
空庭明月閑復閑
夜長路遠山復山

無名氏

後庭宴

千里故鄉十年華
屋亂魂飛過屏山
簇眼重眉褪不勝
春菱花知我銷香玉
雙雙燕子歸來應
解笑人幽獨
斷歌零舞遺恨清江曲
萬樹綠低迷一庭紅撲
蕪

詞綜卷一

詞綜卷二

五代十國詞七十二首

後唐莊宗二首

蜀主王衍一首

蜀主孟昶一首

南唐中宗李景二首

南唐後主李煜十首

和 凝四首

韋 莊二十首

薛昭蘊四首

牛 嶠七首

毛文錫八首

牛希濟二首

歐陽炯十一首

後唐莊宗皇帝

一葉落

一葉落寒朱箔此時景物正蕭索畫樓月影寒西風
吹羅幕吹羅幕往事思量著

憶仙姿

曾宴桃源深洞一曲舞鸞一作清歌歌鳳長記別伊
時和淚出門相送如夢如夢殘月落花烟重

蜀主王衍

醉妝詞

者邊走那邊走只是尋花柳那邊走者邊走莫厭金
杯酒北夢瑣言云蜀主衍嘗裹小巾其尖如錐宮女

多衣道服簪蓮花冠施麝脂夾臉號醉妝作此詞

蜀主孟昶

玉樓春夜起避暑摩訶池上作

冰肌玉骨清無汗，水殿風來暗香滿。繡簾一點月窺人，欹枕釵橫雲鬢亂。起來瓊戶啓無聲，時見疎星渡河漢。屈指西風幾時來，只恐流年暗中換。按蘇子瞻洞仙歌本藥括此詞，然未免反有點金之憾。

南唐中宗李景

山花子

菡萏香銷翠葉殘，西風愁起綠波間。還與韶光共憔悴，不堪看。細雨夢回雞塞遠，小樓吹徹玉笙寒。多少淚珠何限恨，倚闌干。

又

手卷真珠上玉鈎，依前春恨鎖重樓。風裏落花誰是主，思悠悠。青鳥不傳雲外信，丁香空結雨中愁。回首綠波三峽暮，接天流。

後主李煜

相見歡

林花謝了春紅，太匆匆。無奈朝來寒雨晚來風。胭脂淚，相留醉，幾時重。自是人生長恨水長東。

又

無言獨上西樓月如鈎寂寞梧桐深院鎖清秋
翦不斷理還亂是離愁別是一般滋味在心頭黃叔暘
云此詞最悽惋所謂亡國之音哀以思

清平樂

別來春半觸目愁腸斷砌下落梅如雪亂拂了一身
還滿鴈來音信無憑路遙歸夢難成離恨恰如春
草更行更遠還生

浪淘沙

簾外雨潺潺春意闌珊羅衾不暖五更寒夢裏不知
身是客一晌貪歡獨自暮凭欄無限江山別時容
易見時難流水落花歸去也天上人間蔡條云含思
悽惋

又

往事只堪哀對景難排秋風庭院蘚侵階一行珠簾
閑不卷終日誰來金劍已沉埋壯氣蒿萊晚涼天
靜月華開想得玉樓瑤殿影空照秦淮

玉樓春

晚妝初了明肌雪春殿嬪娥魚貫列鳳簫聲斷水雲
閑重按霓裳歌遍徹臨風誰更飄香屑醉拍闌干
情未切歸時休放燭花紅待踏馬蹄清夜月

子夜

花明月暗籠

一作飛輕霧今宵好向郎邊去剗 一作

秋襪步香階

一作苔手提金縷鞋

畫堂南畔見一

晌俚人顫好

一作奴為出一作去來難教君恣意憐

又

人生愁恨何能免消魂獨我情何限故國夢重歸覺

來雙淚垂

高樓誰與上長記秋晴望往事已成空

還如一夢中

虞美人

風迴小院庭蕪綠柳眼春相續凭欄半日獨無言依

舊竹聲新月似當年

笙歌未散樽罍在池面冰初

解燭明香暗畫樓深滿鬢清霜殘雪思難禁

又

春花秋月何時了往事知多少小樓昨夜又東風故

國不堪回首月明中

雕欄玉砌應猶在只是朱顏

改問君能有幾多愁恰似一江春水向東流

臨江仙

櫻桃落盡春歸去蝶翻輕粉雙飛子規啼月小樓西

玉鈎羅幕惆悵暮烟垂

別巷寂寥人散後望殘烟

草低迷爐香閑裊鳳凰兒空持羅帶回首恨依依蘇

子由云淒涼怨慕真亡國之聲也 按是詞在傳後
主在圍城中賦未就而城破闕後三句劉延仲補之
云何時重聽玉驄嘶撲簾柳絮依約夢回時而耆舊
續聞所載故是全作當從之

和

凝

字成績鄆州人舉進士仕後唐知制誥翰
林學士晉天福中拜中書侍郎同中書門
下平章事歸後漢拜太子太傅封魯國公
有紅葉稿

春光好

蘋葉軟杏花明畫船輕雙浴鴛鴦出綠汀棹歌聲
春水無風無浪春天半雨半晴紅粉相隨南浦晚幾
含情

采桑子

蟪蛄領上詞梨子繡帶雙垂椒戶閑時競學樗蒲賭
荔枝 叢頭鞋子紅編細裙窄金絲無事頻眉春思
翻教阿母疑

河滿子

寫得魚牋無限其如花鎖春輝目斷巫山雲雨空教
殘夢依依却愛薰香小鴨羨他長在屏幃

漁父

詞

綜 卷二

三一中華書局聚

白芷汀寒立鷺鷥蘋風輕翦浪花時烟冪冪日遲遲
香引芙蓉惹釣絲

韋

莊字端己杜陵人乾甯元年進士入蜀王建

辟掌書記尋召為起居舍人建表留之後

為蜀散騎常侍判中書門下事有浣花集

菩薩蠻

紅樓別夜堪惆悵香燈半捲流蘇帳殘月出門時美
人和淚辭琵琶金翠羽絃上黃鶯語勸我早歸家
綠窗人似花

又

人人盡說江南好遊人只合江南老春水碧於天畫
船聽雨眠鑪邊人似月皓腕凝霜雪未老莫還鄉
還鄉須斷腸

又

如今却憶江南樂當時年少春衫薄騎馬倚斜橋滿
樓紅袖招翠屏金屈曲醉入花叢宿此度見花枝
白頭誓不歸

又

洛陽城裏春光好洛陽才子他鄉老柳暗魏王堤此
時心轉迷桃花春水淥水上鴛鴦浴凝恨對斜暉

憶君君不知

歸國遙

金翡翠爲我南飛傳我意
罨畫橋邊春水幾年花下
醉別後只知相愧淚珠難
遠寄羅幙繡幃鴛被舊
歡如夢裏

應天長

綠槐陰裏黃鸝語深院無人
春晝午畫簾垂金鳳舞
寂寞繡屏香一炷碧天雲
無定處空有夢魂來去
夜夜綠窗風雨斷腸君信否

又

別來半歲音書絕一寸離腸
千萬結難相見易相別
又是玉樓花似雪暗相思
無處說惆悵夜來烟月
想得此時情切淚沾紅袖
蹴

荷葉杯

絕代佳人難得傾國花下見
無期一雙愁黛遠山眉
不忍更思惟閑掩翠屏
金鳳殘夢羅幕畫堂空碧
天無路信難通惆悵舊房
權古今詞話云韋莊以才
名寓蜀王建割據遂羈留之
莊有寵人姿質豔麗兼
善詞翰建聞之托以教內
人爲詞強莊奪去莊追念
悵悵作小重山及此詞情
意悽怨人相傳播盛行於

詞

綜卷二

四一中華書局聚

時姬後傳聞之遂不食而卒

又

記得那年花下深夜初識謝娘時
水堂西面畫簾垂
攜手暗相期
惆悵曉鶯殘月相別從此隔音塵如
今俱是異鄉人相見更無因

清平樂

野花芳草寂寞關山道
柳吐金絲鶯語早
惆悵香閨暗老
羅帶悔結同心獨凭朱欄思深夢覺半牀斜
月小窗風觸鳴琴

又

鶯啼殘月繡閣香燈滅
門外馬嘶郎欲別
正是落花時節
妝成不畫蛾眉含愁獨倚金屏去路香塵莫
掃掃卽卽去歸遲

河傳

何處烟雨隋堤春暮柳色葱蘢畫橈金縷翠旗高颺
香風水光融
青娥殿脚春妝媚輕雲裏綽約司花
妓江都宮闕清淮月映迷樓古今愁

又

春晚風暖錦城花滿狂殺遊人玉鞭金勒尋勝馳驟
輕塵惜良晨
翠蛾爭勸臨卣酒纖纖手拂面垂絲

柳歸時烟裏鍾鼓正是黃昏暗銷魂

又

錦浦春女繡衣金縷霧薄雲輕花深柳暗時節正是
清明雨初晴 玉鞭魂斷烟霞路鶯鶯語一望巫山
雨香塵隱映遙望翠檻紅樓黛眉愁

訴衷情

燭燼香殘簾半卷夢初驚花欲謝深夜月籠明何處
按歌聲輕輕舞衣塵暗生負春情

又

碧沼紅芳烟雨淨倚蘭橈垂玉珮交帶裊纖腰鴛夢
隔星橋迢迢越羅香暗銷墜花翹

上行盃

芳草灞陵春岸柳烟深滿樓絃管一曲離聲腸寸斷
今日送君千萬紅樓玉盤金鏤盞須勸珍重意莫
辭滿

女冠子

四月十七正是去年今日別君時忍淚佯低面含羞
半斂眉 不知魂已斷空有夢相隨除却天邊月沒
人知

更漏子

詞

綜卷一

五中華書局聚

鐘鼓寒樓閣暝月照古桐金井深院閉小庭空落花
香露紅 烟柳重春霧薄燈背水窗高閣閑倚戶暗
沾衣待郎郎不歸

薛昭蘊仕至侍郎

浣溪沙

粉上依稀有淚痕郡庭花落欲黃昏遠情深恨與誰
論 記得去年寒食日延秋門外卓金輪日斜人散
暗銷魂

相見歡

羅襦繡袂香紅畫堂中細草平沙蕃馬小屏風 卷
羅幕凭妝閣思無窮暮雨輕烟魂斷隔簾櫳

女冠子

求仙去也翠鈿金篋盡捨入巖巒霧卷黃羅帔雲彫
白玉冠 野烟溪洞冷林月石橋寒靜夜松風下禮
天壇

謁金門

春滿院疊損羅衣金線睡覺水精簾未卷簾前雙語
燕 斜掩金鋪一扇滿地落花千片早是相思腸欲
斷忍教頻夢見

牛 嶠字松卿一字延峯隴西人乾符五年進士

歷官拾遺補尚書郎王建鎮蜀辟判官後
仕蜀爲給事中

女冠子

錦江烟水卓女燒春濃美小檀霞繡帶芙蓉帳金釵
芍藥花額黃侵膩髮臂釧透紅紗柳暗鶯啼處認
郎家

感恩多

兩條紅粉淚多少香闥意強攀桃李枝斂愁眉陌
上鶯啼蝶舞柳花飛柳花飛願得郎心憶家還早歸
望江怨

東風急惜別花時手頻執羅幃愁復入馬嘶殘雨
春蕪濕倚馬立寄語薄情郎粉香和淚泣

菩薩蠻

舞裙香暖金泥鳳畫梁語燕驚殘夢門外柳花飛玉
郎猶未歸愁勻紅粉淚眉翦春山翠何處是遼陽
錦屏春晝長

又

綠雲鬢上飛金雀愁眉斂翠春烟薄香閣掩芙蓉畫
屏山幾重窗寒天欲曙猶結同心苴啼粉澹羅衣
問郎何日歸

西溪子

捍撥雙盤金鳳蟬鬢玉釵搖動畫堂前人不語絃解語彈到昭君怨處翠蛾愁不擡頭

江城子

鷓鴣飛起郡城東碧江空半灘風越王宮殿蘋葉藕花中簾捲水樓魚浪起千片雪雨濛濛

毛文錫

字平珪唐進士事蜀為翰林學士遷內樞密使歷文思殿大學士司徒

虞美人

鴛鴦對浴銀塘暖水面蒲稍短垂楊低拂麴塵波蛛絲結網露珠多滴圓荷遙思桃葉吳江碧便是天涯隔錦鱗紅鬣影沉沉相思空有夢相尋意難任

又

寶檀金縷鴛鴦枕綬帶盤宮錦夕陽低映小窗明南園綠樹語鶯鶯夢難成玉爐香暖頻添炷滿地飄輕絮珠簾不捲度沉烟庭前閑立畫鞦韆豔陽天

更漏子

春夜闌春恨切花外子規啼月人不見夢難憑紅紗

一點燈偏怨別是芳節庭下丁香千結宵霧散曉

霞輝梁間雙燕飛

紗窗恨

新春燕子還來至一雙飛壘巢泥溼時時墜宛人衣
後園裏看百花發香風拂繡戶金屏月照紗窗恨
依依

又

雙雙蜨翅塗鉛粉啣花心綺窗繡戶飛來穩畫堂陰
一二月愛隨飄絮伴落花來拂衣襟更翦輕羅片
傅黃金

醉花間

休相問怕相問相問還添恨春水滿塘生鷓鴣還相
趁昨夜雨霏霏臨明寒一陣偏憶戍樓人久絕邊
庭信

又

深相憶莫相憶相憶情難極銀漢是紅牆一帶遙相
隔金盤珠露滴兩岸榆花白風搖玉珮清今夕爲
何夕

巫山一段雲

雨霽巫山上雲輕映碧天遠風吹散又相連十二晚
峯前暗濕啼猿樹高籠過客船朝朝暮暮楚江邊
幾度降神仙

牛希濟嶠兄子仕蜀爲御史中丞降於後唐

珍做宋版印

生查子

春山烟欲收天澹稀星少殘月臉邊明別淚臨清曉
語已一本無已字多情未了回首猶重道記得綠
羅裙處處憐芳草

又

新月曲如眉未有團圓意紅豆不堪看滿眼相思淚
終日劈桃穰人在心兒裏兩朵隔牆花早晚成連
理

歐陽炯事後蜀爲中書舍人宣和畫譜貫休傳云
大學士

三字令

春欲盡日遲遲牡丹時羅幌卷翠簾垂彩箋書紅粉
淚兩心知人不在燕空歸負佳期香燼落枕函欵
月分明花淡薄惹相思

南鄉子

嫩草如烟石榴花發海南天日暮江亭春影綠鴛鴦
浴水遠山長看不足

又

畫舸停橈槿花籬外竹橫橋水上遊人沙上女迴顧

笑指芭蕉林裏住

又

岸遠沙平日斜歸路晚霞明孔雀自憐金翠尾臨水
認得行人驚不起

又

洞口誰家木蘭船繫木蘭花紅袖女郎相引去南浦
笑倚春風相對語

又

路入南中桄榔葉暗蓼花紅兩岸人家微雨後收紅
豆樹底纖纖擡素手

又

袖斂鮫綃采香深洞笑相邀藤杖杖頭蘆酒滴鋪葵
席豆蔻花間趁晚日

賀聖朝

憶昔花間初識面紅袖半遮妝臉輕轉石榴裙帶故
將纖纖玉指偷撚雙鳳金線碧梧桐鎖深深院誰
料得兩情何日教繾綣羨春來雙燕飛到玉樓朝暮
相見

江城子

曉日金陵岸草平落霞明水無情六代繁華暗逐逝

波聲空有姑蘇臺上月如西子鏡照江城

鳳樓春

鳳髻綠雲叢深掩房櫳錦書通夢中相見覺來慵勻
面淚臉珠融因想玉郎何處去對淑景誰同 小樓
中春思無窮倚闌凝望闌牽愁緒柳花飛趁東風斜
日照簾櫳羅幌香冷粉屏空海棠零落鶯語殘紅

清平樂

春來街砌春雨如絲細春徑滿飄紅杏帶春燕舞隨
風勢 春幡細縷春繒春閨一點春燈自是春心撩
亂非關春夢無憑

詞綜卷二

五代十國詞七十六首

顧 夔九首

鹿虔扈一首

閻 選二首

魏承班二首

尹 鶉二首

毛熙震五首

李 珣十五首

孫光憲十三首

張 泌五首

馮延巳二十首

成幼文一首

耿玉真一首

顧

夔仕蜀為太尉

河傳

燕颺晴景小窗屏暖鴛鴦交頸菱花掩却翠鬟欹慵
整海棠簾外影 繡幃香斷金鸞鸞無消息心事空
相憶倚東風春正濃愁紅淚痕衣上重

又

棹舉舟去波光渺渺不知何處岸花汀草共依依雨
微鷓鴣相逐飛 天涯離恨江聲咽啼猿切此意向
誰說倚蘭橈獨無慘魂銷小鑪香欲焦

醉公子

漠漠秋雲澹紅藕香侵檻枕倚小山屏金鋪向晚局
睡起橫波慢獨望情何限衰柳數聲蟬魂銷似去

年

又

岸柳垂金線雨晴鶯百轉家住綠楊邊往來多少少年
馬嘶芳草遠高樓簾半捲斂袖翠蛾攢相逢爾許
難

玉樓春

月照玉樓春漏促颯颯風搖庭砌竹夢驚鴛被覺來
時何處管絃聲斷續惆悵少年游冶去枕上兩蛾
攢細綠曉鶯簾外語花枝背帳猶殘紅蠟燭

訴衷情

香滅簾垂春漏永整鴛衾羅帶重雙鳳縷黃金窗外
月光臨沉沉斷腸無處尋負春心

又

永夜拋人何處去絕來音香閣掩眉斂月將沉爭忍
不相尋怨孤衾換我心為你心始知相憶深

臨江仙

碧染長空池似鏡倚樓閑望凝情滿衣紅藕細香清
象牀珍簟山障掩玉琴橫暗想昔年歡笑事如今
贏得愁生博山爐暖澹烟輕蟬吟人靜殘日傍小窗
明

楊柳枝

秋夜香闥思寂寥漏迢迢鴛鴦幃羅幌麝烟銷燭光搖
正憶玉郎遊蕩去無尋處更聞簾外雨瀟瀟滴芭蕉

鹿虔扈事蜀爲永泰軍節度使加太保

臨江仙

金鎖重門荒苑靜綺窗愁對秋空翠華一去寂無蹤
玉樓歌吹聲斷已隨風烟月不知人事改夜闌還
照深宮藕花相向野塘中暗傷亡國清露泣香紅

閨選後蜀處士事後主

浣溪沙

寂寞流蘇冷繡茵倚屏山枕惹香塵小庭花露泣濃
春劉阮信非仙洞客嫦娥終是月中人此生無路
訪東隣

河傳

秋雨秋雨無晝無夜滴滴霏霏暗燈涼簟怨分離妖
姬不勝悲西風稍急喧窗竹停又續膩臉懸雙玉
幾回邀約鴈來時違期鴈歸人不歸

魏承班仕至太尉

玉樓春

詞

綜卷二

一一中華書局聚

寂寂畫堂梁上燕高卷翠簾橫數扇一庭春色惱人
來滿地落花紅幾片愁倚錦屏低雪面淚滴繡羅
金縷線好天涼月盡傷心為是玉郎長不見

生查子

烟雨晚晴天零落花無語難話此時心梁燕雙來去
琴韻對薰風有恨和情撫腸斷斷絃頻淚滴黃金

縷

尹 鶚官參卿

臨江仙

深秋寒夜銀河靜月明深院中庭西窗幽夢等閑成
逡巡覺後特地恨難平紅燭半條殘焰短依稀暗
背銀屏枕前何事最傷情梧桐葉上點點露珠零

菩薩蠻

隴雲暗合秋天白俯窗獨坐窺烟陌樓際角重吹黃
昏方醉歸 荒唐難共語明日還應去上馬出門時
金鞭莫與伊

毛熙震蜀人官秘書監

臨江仙

幽閨欲曙聞鶯轉紅窗月影微明好風頻謝落花聲
隔幃殘燭猶照綺屏箏 繡被錦茵眠玉暖炷香斜

裊烟輕淡蛾羞斂不勝情暗思閑夢何處逐雲行

清平樂

春光欲暮寂寞閑庭戶粉蝶雙雙穿檻舞簾卷晚天
疎雨含愁獨倚閨幃玉爐烟斷香微正是銷魂時
節東風滿樹花飛

南歌子

遠山愁黛碧橫波慢臉明膩香紅玉茜羅輕深院晚
堂人靜理銀箏鬢動行雲影裙遮點屐聲嬌羞愛
問曲中名楊柳杏花時節幾多情

後庭花

越羅小袖新香菖薄籠金釧倚闌無語搖輕扇半遮
勻面春殘日煖鶯嬌懶滿庭花片一作綻爭不教
人長相見畫堂深院

河滿子

寂寞芳菲暗度歲華如箭堪驚緬想舊歡多少事轉
添春思難平曲檻絲垂金柳小窗絃斷銀箏深院
空聞燕語滿園閑落花輕一片相思休不得忍教長
日愁生誰見夕陽孤夢覺來無限傷情

李

珣梓州人蜀秀才有瓊瑤集黃休復茅亭客

話其先波斯人有詩名預賓貢

巫山一段雲

古廟依青嶂行宮枕碧流水聲山色鎖妝樓往事思
悠悠雲雨朝還暮烟花春復秋啼猿何必近孤舟
行客自多愁黃叔暘云唐詞多緣題所賦臨江仙則
言仙事女冠子則述道情河瀆神則咏祠廟大概不
失本題之意爾後漸變失題遠矣如珣此作實唐人
本來詞體如此

南鄉子

烟漠漠雨淒淒岸花零落鷓鴣啼遠客扁舟臨野渡
思鄉處潮退水平春色暮

又

蘭橈舉水紋開競攜藤籠采蓮來迴塘深處遙相見
邀同宴淥酒一卮紅上面

又

歸路近扣舷歌采真珠處水風多曲岸小橋山月過
烟深鎖荳蔻花垂千萬朵

又

乘綵舫過蓮塘棹歌驚起睡鴛鴦帶香游女偎人笑
一作游女帶香偎伴笑爭窈窕競折團荷遮晚照

又

傾綠蟻泛紅螺閑邀女伴簇笙歌避暑信船輕浪裏
閑游戲夾岸荔支紅蘸水

又

漁市散渡船稀越南雲樹望中微行客待潮天欲暮
迷春浦愁聽猩猩啼瘴雨

又

相見處晚晴天刺桐花下越臺前暗裏迴眸深屬意
遺雙翠騎象背人先過水

又

攜籠去采菱歸碧波風起雨霏霏趁岸小船齊棹急
羅衣濕出向桄榔樹下立

又

登畫舸泛清波采蓮時唱采蓮歌攔棹聲齊羅袖斂
池光颭驚起沙鷗八九點

又

雙髻墜小眉灣笑隨女伴下春山玉纖遙指花深處
爭迴顧孔雀雙雙迎日舞

菩薩蠻

迴塘風起波紋細刺桐花裏門斜閉殘日照平蕪雙
雙飛鷓鴣征帆何處客相見還相隔不語欲魂銷

望中烟水遙

又

隔簾微雨雙飛燕
砌花零落紅深淺
捻得寶箏調心
隨征棹遙
楚天雲外路動便
經年去香斷畫屏深
舊歡何處尋

西溪子

金縷翠鈿浮動妝罷
小窗圓夢日高時
春已老人未到
滿地落花慵掃
無語倚屏風
泣殘紅尊前集作離
思正難緘燕喃喃

河傳

去去何處迢迢
巴楚山水相連
朝雲暮雨依舊十二
峯前猿聲到客船
愁腸豈異丁香結
因離別故國
音書絕想佳人
花下對明月
春風恨應同

孫光憲

字孟文陵州人游荆南高從晦署爲從事

仕南平累官檢校祕書兼御史大夫勸高

繼冲獻三州之地宋太祖授以黃州刺史

將用爲學士未及而卒有荆臺筆傭橘齋

鞏湖諸集

河瀆神

汾水碧依依黃雲落葉初飛
翠娥一去不言歸廟門

空掩斜暉 四壁陰森排古畫依舊瓊輪羽駕小殿
沉沉清夜銀燈飄落香炷

又

江上草芊芊春晚湘妃廟前一方卵色楚南天數行
斜鴈聯翩 獨倚朱闌情不極魂斷終朝相憶兩槩
不知消息遠汀時起鷓鴣

後庭花

石城依舊空江國故宮春色七尺青絲芳草碧絕世
難得 玉英落盡何人識野棠如織只是教人添怨
憶悵望無極

清平樂

愁腸欲斷正是青春半連理分枝鸞失伴又是一場
離散 掩鏡無語眉低思隨芳草萋萋憑仗東風吹
夢與郎終日東西

女冠子

淡花瘦玉依約神仙妝束佩瓊文瑞露通霄貯幽香
盡日焚 碧紗籠絳節黃藕冠濃雲勿以吹簫伴不
同羣

風流子

樓倚長堤欲暮瞥見神仙伴侶微傅粉攏梳頭隱映

畫簾開處無語無緒慢曳羅裙歸去

又

金絡玉銜嘶馬繫向綠楊陰下朱戶掩繡簾垂曲院
水流花謝歡罷歸也猶在九衢深夜

思帝鄉

如何遣情情更多永日水晶簾下斂羞蛾六幅羅裙
牽地微行曳碧波看盡滿池疎雨打團荷

上行盃

離棹逡巡欲動臨極浦故人相送去住心情知不共
金船滿捧綺羅愁絲管咽迴別帆影滅江浪如雪

浣溪沙

蓼岸風多橘柚香江邊一望楚天長片帆烟際閃孤
光目送征鴻飛杳杳思隨流水去茫茫蘭紅波碧
憶瀟湘

謁金門

留不得留得也應無益白紵春衫如雪色揚州初去
日輕別離甘拋擲江上滿帆風疾却羨綵鴛三十
六孤鸞還一隻

思越人

古臺平芳草遠館娃宮外春深翠黛空留千載恨教

人何處相尋
綺羅無復當時事
露花點滴香淚惆
悵遙天橫淥水
鴛鴦對對飛起

又

渚蓮枯宮樹老
長洲廢苑蕭條
想像玉人空
一作何處所月明
獨上溪橋
經春初敗
秋風起紅蘭綠蕙
愁死一片風流
傷心地魂銷目斷
西子

張

泌字子澄江南人仕南唐爲內史舍人

酒泉子

紫陌青門三十六宮
春色御溝輦路暗
相通杏園風
咸陽沽酒寶釵空
笑指未央歸去
插花走馬落殘
紅月明中

南歌子

柳色遮樓暗
桐花落砌香
畫堂開處遠
風涼高卷水
精簾額襯斜陽

江城子

碧闌干外小
中庭雨初晴
曉鶯聲飛絮
落花時節近
清明睡起
卷簾無一事
勻面了沒心情

又

浣花溪上見
卿卿險波明
黛眉輕高
綰綠雲金簇小
蜻蜓好是問
他來得麼和
笑道莫多情

詞

綠卷三

六一中華書局聚

浣溪沙

鈿轂香車過柳堤
樺烟分處馬頻嘶
爲他沉醉不成泥
花滿驛亭香露細
杜鵑聲斷玉蟾低
含情無語倚樓西

馮延巳

字正中其先彭城人唐末徙家新安事南唐爲左僕射同平章事有陽春錄一卷

陳世脩序云馮公全外舍祖樂府思深詞麗韻逸調新

羅敷豔歌

馬嘶人語春風岸
芳草綿綿楊柳橋
邊落日高樓酒旆懸
舊愁新恨知多少
目斷遙天獨立花前更聽
笙歌滿畫船

又

小堂深靜無人到
滿院春風惆悵牆東一樹櫻桃帶
雨紅
愁心似醉兼如病
欲語還慵日暮疎鐘雙燕
歸來畫閣中

清平樂

雨晴烟晚綠水新池
滿雙燕飛來垂柳院
小閣畫簾高捲
黃昏獨倚朱欄
西南初月眉灣
砌下落花風

起羅衣特地春寒

又

春愁南陌故國音書隔細雨霏霏梨花白燕拂畫簾
金額 盡日相望王孫塵滿羅衣淚痕誰向橋邊吹
笛駐馬西望銷魂

芳草渡

梧桐落蓼花秋烟初冷雨纔收蕭條風物正堪愁人
去後多少恨在心頭 燕鴻遠羌笛怨渺渺澄波一
片山如黛月如鉤笙歌散魂夢斷倚高樓

歸國謠

江水碧江上何人吹玉笛扁舟遠送瀟湘客 蘆花
千里霜月白傷行色明朝便是關山隔

蝶戀花

六曲闌干偎碧樹楊柳風輕展盡黃金縷誰把鈿箏
移玉柱穿簾燕子雙飛去 滿眼游絲兼落絮紅杏
開時一霎清明雨濃睡覺來鶯亂語驚殘好夢無尋
處

又

誰道閑情拋棄久每到春來惆悵還依舊日日花前
常病酒不辭鏡裏朱顏瘦 河畔青蕪堤上柳為問
新愁何事年年有獨立小橋風滿袖平林新月人歸

詞

綜 卷二

七一中華書局聚

後

又

幾日行雲何處去忘却歸來不道春將暮百草千
寒食路香車繫在誰家樹淚眼倚樓頻獨語雙燕
來時陌上相逢否掩亂春愁如柳絮依依夢裏無尋
處

又

庭院深深深幾許楊柳堆烟簾幙無重數玉勒雕鞍
遊冶處樓高不見章臺路雨橫風狂三月暮門掩
黃昏無計留春住淚眼問花花不語亂紅飛過秋千
去

南鄉子

細雨溼秋風金鳳花殘滿地紅閑蹙黛眉慵不語月
緒寂寞相思知幾許玉枕擁孤衾抱恨還同歲情
深簾卷曲房誰共醉憔悴惆悵秦樓彈粉淚

喜遷鶯

宿鶯啼鄉夢斷春樹曉朦朧殘燈和燼閉朱櫳人語
隔屏風香已寒燈已絕忽憶去年離別石城花雨
倚江樓波上木蘭舟

虞美人

玉鉤鸞柱調鸚鵡宛轉留春語雲屏冷落畫堂空薄
晚春寒無奈落花風 舉簾燕子低飛去拂鏡塵鸞
舞不知今夜月眉彎誰佩同心雙結倚闌干

拋球樂

梅落新春入後庭眼前風物可無情曲池波晚冰還
合芳草迎船綠未成且上高樓望相共憑欄看月生

又

霜積秋山萬樹紅倚巖樓上挂朱櫳白雲天遠重重
恨黃葉烟深浙浙風髣髴梁州曲吹在誰家玉笛中

菩薩蠻

欹鬟墮髻搖雙槳采蓮晚出清江上顧影約流萍楚
歌嬌未成 相逢顰翠黛笑把珠璫解家住柳陰中
畫橋東復東

三臺令

春色春色依舊青山紫陌日斜柳暗花蔫醉臥春風
少年少年少年少行樂直須及早

又

南浦南浦翠鬟離人何處當時携手高樓依舊樓前
水流流水流水中傷心雙淚

浣溪沙

馬上凝情憶舊遊照花淹竹小溪流鈿箏羅幕玉搔頭
早是出門長帶月可堪分袂又經秋晚風斜日
不勝愁

應天長

一鉤初月臨妝鏡蟬鬢鳳釵慵不整重簾靜層樓迥
惆悵落花風不定綠烟低柳逕何處鞦韆金井昨
夜更闌酒醒春愁過却病

成幼文江南人仕南唐官大理卿

謁金門

風乍起吹皺一池春水閑引鴛鴦香徑裏手接紅杏
藥鬪鴨闌干遍倚碧玉搔頭斜墜終日望君君不
至舉頭聞鶯喜陳質齋云世言風乍起為馮延巳作
或云成幼文也今陽春集無有當是幼文作

耿玉真女郎南唐書云盧絳病瘖且死夜夢白衣

婦人歌此詞勸酒歌數闋因謂絳曰子之

疾食蔗即愈如言果差迨數夕又夢前婦

人曰妾乃玉真也他日富貴相見于固子

坡後入金陵累官柱國唐亡歸宋以龔慎

儀事坐誅臨刑有白衣婦人同斬姿貌宛

如所夢問其姓名曰耿玉真問受刑之地

卽園子坡也

菩薩蠻

玉京人去秋蕭索
畫簷鵲起梧桐
落欹枕
悄無言
月
和清夢圓
背燈惟暗泣
何處砧聲急
眉黛遠
山攢
芭蕉生暮寒

詞綜卷二

詞綜卷四

宋詞六十七首

徽宗皇帝二首

高宗皇帝一首

徐昌圖一首

潘 閔三首

夏 竦一首

寇 準三首

王禹偁一首

錢惟演一首

晏 殊八首

賈昌朝一首

王 琪二首

林 逋二首

李遵勗一首

葉清臣一首

聶冠卿一首

李師中一首

韓 琦一首

范仲淹三首

宋 祁二首

鄭 獬一首

韓 縝一首

張 昇一首

謝 絳一首

歐陽脩二十一首

梅堯臣一首

石延年一首

司馬光一首

王安石二首

范純仁一首

徽宗皇帝

探春令

簾旌微動悄寒天氣龍池冰泮杏花笑吐香猶淺又

還是春將半 清歌妙舞從頭按等芳時開宴記去
年對著東風曾許不負鶯花願

燕山亭見杏花作

裁剪冰綃輕疊數重冷淡臙脂勻注新樣靚妝艷溢
香融羞殺藥珠宮女易得凋零更多少無情風雨愁
苦問院落淒涼幾番春暮 憑寄離恨重重這雙燕
何曾會人言語天遙地遠萬水千山知他故宮何處
怎不思量除夢裏有時曾去無據和夢也有時一作
新來不做

高宗皇帝

漁父詞

水涵微雨湛虛明小笠輕蓑未要晴明鏡裏縠紋生
白鷺飛來空外聲廖瑩中江行雜錄云漁父詞清新
簡遠雖古之騷人詞客老於江湖擅名一時者不能
企及

徐昌圖 莆陽人太祖時守國子博士累遷殿中丞

臨江仙

飲散離亭西去浮生長恨飄蓬回頭烟柳漸重重淡
雲孤鴈遠寒日暮天紅 今夜畫船何處潮平淮月
朦朧酒醒人靜奈愁濃殘燈孤枕夢輕浪五更風

潘

閱字逍遙大名人太宗朝賜進士第坐事遁

中條山後收繫得釋以為滁州參軍有詞

一卷

酒泉子

長憶孤山山在湖心如黛簇僧房四面向湖開輕棹
去還來 芰荷香細連雲閣閣上清聲簷下鐸別來
塵土汚人衣空役夢魂飛 山陰陸子適云句法清古
語帶烟霞近時罕及

又

長憶西湖靈隱寺前天竺後冷泉亭上幾曾遊三伏
似清秋 白猿時見攀高樹長嘯一聲何處去別來
幾向畫圖看終是欠峯巒

又

長憶西湖湖水上盡日憑欄樓上望三三兩兩釣魚
舟島嶼正清秋 笛聲依約蘆花裏白鳥成行忽驚
起別來閑想整綸竿思入水雲寒古今詞話云石曼
卿見此詞使畫工繪之作圖又湘山云錢希白愛之
自書玉堂屏風

夏

竦字子喬德安人舉賢良方正慶曆中同中

書門下平章事判大名府召入為宰相改

詞

綜 卷四

一一中華書局聚

樞密使封英國公進鄭國公卒贈大師中書令謚文正劉敞言竦姦邪謚為正不可改謚文莊有集

喜遷鶯令宮詞

霞散綺月垂鈎簾卷未央樓夜涼銀漢截天流宮闕鎖清秋
瑤臺樹金莖露鳳髓香盤烟霧三千珠翠擁宸遊
水殿按涼州

寇

準字平仲下邳人太平興國中進士累官尚

書右僕射集賢殿大學士景德中同中書門下平章事封萊國公為丁謂所構乾興初貶雷州司戶參軍卒贈中書令謚忠愍有巴東集

點絳脣

小陌輕寒社公雨足東風慢定巢新燕溼雨穿花轉象尺薰爐拂曉停針線愁蛾淺飛紅零亂側臥珠簾捲

江南春

波渺渺柳依依孤村芳草遠斜日杏花飛江南春盡離腸斷蘋滿汀洲人未歸

陽關引

塞草烟光闊渭水波聲咽春朝雨霽輕塵斂征鞍發
指青青楊柳又是輕攀折動黯然知有後會甚時節
更盡一杯酒歌一闋歎人生裏難歡聚易離別且
莫辭沉醉聽取陽關徹念故人千里自此共明月

王禹偁字元之鉅野人太平興國八年進士第累
知制誥入翰林爲學士咸平初出守黃州
徙蘄州卒有小畜集

點絳脣

雨恨雲愁江南依舊稱佳麗水村漁市一縷孤烟細
天際征鴻遙認行如綴平生事此時凝睇誰會憑

欄意

錢惟演字希聖吳越王俶之子少補牙門將歸宋
爲右屯衛將軍累遷樞密使罷爲鎮國軍
節度觀察留後改保大軍節度使知河陽
入朝加同中書門下平章事坐擅議宗廟
且與后家通婚落平章事爲崇信軍節度
使歸鎮卒謚曰思改謚文僖有擁旄集

玉樓春

城上風光鶯語亂城下烟波春拍岸綠楊芳草幾時
休淚眼愁腸先已斷
情懷漸變成衰晚鸞鏡朱顏

驚暗換昔年多病厭芳樽今日芳樽惟恐淺黃叔暘
云此暮年作詞極悽惋

晏

殊

字同叔臨川人景祐二年同進士出身康

定間拜集賢殿學士同中書門下平章事

兼樞密使卒贈司空兼侍中謚元獻有珠

玉詞一卷

晁无咎云元獻不蹈襲人語而風調閑雅

如舞低楊柳樓心月歌盡桃花扇底風知

此人不住三家村也 劉貢父云元獻尤

喜馮延巳歌詞其所自作亦不減延巳

破陣子

燕子來時新社梨花落後清明池上碧苔三四點葉
底黃鸝一兩聲日長飛絮輕 巧笑東鄰女伴采桑
徑裏逢迎疑怪昨宵春夢好元是今朝鬪草贏笑從
雙臉生

清平樂

金風細細葉葉梧桐墜綠酒初嘗人易醉一枕小窗
濃睡 紫薇朱槿初殘斜陽却照闌干雙燕欲歸時
節銀屏昨夜微寒

又

紅牋小字說盡平生意鴻鴈在雲魚在水惆悵此情
難寄 斜陽獨倚西樓遙山恰對簾鉤人面不知何
處綠波依舊東流

踏莎行

碧海無波瑤臺有路思量便合雙飛去當時輕別意
中人山長水遠知何處 綺席凝塵香閨掩霧紅箋
小字憑誰附高樓目盡欲黃昏梧桐葉上蕭蕭雨

又

小徑紅稀芳郊綠遍高臺樹色陰陰見春風不解禁
楊花濛濛亂撲行人面 翠葉藏鶯珠簾隔燕爐香
靜逐遊絲轉一場愁夢酒醒時斜陽却照深深院

蝶戀花

檻菊愁烟蘭泣露羅幙輕寒燕子雙飛去明月不諳
離別苦斜光到曉穿朱戶 昨夜西風凋碧樹獨上
高樓望盡天涯路欲寄彩鸞無尺素山長水闊知何
處

清商怨

關河愁思望處滿漸素秋向晚鴈過南雲行人回淚
眼 雙鸞衾裯悔展夜又永枕孤人遠夢未成歸梅
花聞塞管

相思兒令

昨日探春消息湖上綠波平無奈遶堤芳草還向舊
痕生 有酒且醉瑤觥更何妨檀板新聲誰教楊柳
千絲就中牽繫人情

賈昌朝

字子明獲鹿人天禧中進士累拜同中書
門下平章事兼侍中封許國公進魏國公

卒謚文元有集

木蘭花令

都城水淥嬉遊處仙棹往來人笑語紅隨遠浪泛桃
花雪散平堤飛柳絮 東君欲共春歸去一陣狂風
和驟雨碧油紅旆錦障泥斜日畫橋芳草路黃叔暘
云文元公平生惟賦此一詞極有風味

王

琪

字君玉華陽人舉進士歷官知制誥加樞
密直學士以禮部侍郎致仕

陳輔之云君玉有望江南十首自謂謫仙

荆公酷愛其紅綃香潤入梅天之句

望江南

江南雨風送滿長川碧瓦烟昏沉柳岸紅綃香潤入
梅天飄灑正瀟然 朝與暮長在楚峯前寒夜愁敲
金帶枕春江深閉木蘭船烟渚遠相連

又

江南岸雲樹半晴陰帆去帆來天亦老潮生潮落日
空沉南北別離心興廢事千古一沾襟山下孤烟
漁市遠柳邊疎雨酒家深行客莫登臨

林

逋

字君復錢塘人結廬孤山二十年足不及
城市真宗賜以粟帛詔長吏歲時勞問既
卒仁宗賜謚和靖先生有集

霜天曉角梅

冰清霜潔昨夜梅花發甚處玉龍三弄聲搖動枝頭
月夢絕金獸熱曉寒蘭燼滅要捲珠簾清賞且莫
掃堦前雪

點絳脣草

金谷年年亂生春色誰為主餘花落處滿地和煙雨
又是離歌一闋長亭暮王孫去萋萋無數南北東
西路

李遵勗字公武崇矩孫第進士尚荆國大長公主

授左龍武軍駙馬都尉累遷寧國軍節度
使徙鎮國軍知許州卒贈中書令謚和文
有閑宴集

滴滴金

詞

綜卷四

五中華書局聚

帝城五夜宴遊歇殘燈外看殘月都來猶在醉鄉中
聽更漏初徹行樂已成閑話說如春夢覺時節大
家同約探春行問甚花先發

葉清臣字道卿長洲人天聖初進士歷官翰林學

士權三司使罷知河陽卒贈左諫議大夫

有集

賀聖朝

滿斟綠醕留君住莫匆匆歸去三分春色二分愁更
一分風雨花開花謝都來幾許且高歌休訴不知
來歲牡丹時再相逢何處

聶冠卿字長孺新安人舉進士慶曆中入翰林為

學士判昭文館兼侍讀學士有蘄春集

多麗李良定席上賦

想人生美景良辰堪惜向其間賞心樂事古來難是
并得况東城鳳臺沁苑泛晴波淺照金碧露洗華桐
烟霏絲柳綠陰搖曳蕩春一色畫堂迴玉簪瓊佩高
會盡詞客清歡久重燃絳蠟別就瑤席有飄若驚
鴻體態暮為行雨標格逞朱脣緩歌妖麗似聽流鶯
亂花隔慢舞縈回嬌鬢低顰腰肢纖細困無力忍分
散彩雲歸後何處更尋覓休辭醉明月好花莫謾輕

攢黃叔暘云冠卿詞不多見如此篇亦可謂才情富麗矣其露洗華桐四句又所謂玉中之琪璧珠中之夜光每一觀之撫玩無斲胡元任云露洗華桐二語此是仲春天氣下乃云綠陰搖曳蕩春一色其時未有綠陰亦語病也

李師中字誠之楚丘人中進士科仁宗朝權主管經略司文字提點廣西刑獄歷天章閣待制河東都轉運使貶和州團練副使安置遷右司郎中

菩薩蠻

子規啼破城樓月畫船曉載笙歌發兩岸荔支紅萬家烟雨中佳人相對泣淚下羅衣溼從此信音稀嶺南無鴈飛

韓

琦

字稚圭安陽人天聖中進士嘉祐初同中

書門下平章事集賢殿大學士遷昭文館大學士封儀國公進封衛國公再進魏國公拜右僕射卒贈尚書令謚忠獻徽宗追論定策勳贈魏郡王有安陽集

吳虎臣云魏公皇祐初鎮揚州撰維揚好四章所謂二十四橋千步柳春風十里上

珠簾者是也其後罷相出鎮安陽復作安陽好詞十章

珍做宋版印

點絳脣

病起恹恹庭前花影添憔悴亂紅飄砌滴盡真珠淚
惆悵前春誰向花前醉愁無際武陵凝睇人遠波
空翠

范仲淹

字希文吳縣人大中祥符八年進士仕至樞密副使參知政事卒贈兵部尚書楚國公謚文正有集

蘇幕遮

碧雲天紅葉地秋色連波波上寒烟翠山映斜陽天
接水芳草無情更在斜陽外黯鄉魂追旅意夜夜
除非好夢留人睡明月樓高休獨倚酒入愁腸化作
相思淚

御街行

紛紛墜葉飄香砌夜寂靜寒聲碎真珠簾捲玉樓空
天澹銀河垂地年年今夜月華如練長是人千里
愁腸已斷無由醉酒未到先成淚殘燈明滅枕頭欵
諳盡孤眠滋味都來此事眉間心上無計相迴避
漁家傲

塞下秋來風景異，衡陽鴈去無留意。四面邊聲連角起，千嶂裏長烟落日孤城閉。濁酒一杯家萬里，燕然未勒歸無計。羌管悠悠霜滿地，人不寐，將軍白髮征夫淚。

宋

祁字子京，安州安陸人。徙開封之雍丘。天聖

中進士，累官翰林學士承旨。卒，贈尚書謚

景文。有出麾小集、西州猥稿。

李端叔云：宋景文歐陽永叔以餘力遊戲而風流閑雅，超出意表。

好事近

睡起玉屏風，吹去亂紅猶落。天氣驟生輕暖，襯沉香帷箔。珠簾約住海棠風，愁拖兩眉角。昨夜一庭明月冷，秋千紅索。

浪淘沙

別劉原父

少年不管流光如箭，因循不覺韶華換。到如今始惜月滿花滿酒滿。扁舟欲解，垂楊岸尚同歡宴。日斜歌闋，將分散，倚蘭橈望水遠。天遠人遠。

鄭

獬字毅夫，安陸人。皇祐五年舉進士，第累官

翰林學士。坐不肯用按問新法，王安石惡之，出爲侍讀學士。知杭州，徙青州，有鄭溪

好事近

江上探春回正值早梅時節兩行小槽雙鳳按涼州
初徹謝娘扶下繡鞍來紅靴踏殘雪歸去不須銀
燭有山頭明月

韓

續

字玉汝雍丘人第進士累官太中大夫知
樞密院事拜尚書右僕射兼中書侍郎以

太子太保致仕贈司空崇國公謚莊敏

芳草即鳳簫吟

鎖離愁連綿無際來時陌上初熏繡幃人念遠暗垂
珠露泣送征輪長行長在眼更重重遠水孤雲但望
極樓高盡日目斷王孫消魂池塘別後曾行處綠
妒輕裙恁時携素手亂花飛絮裏緩步香茵朱顏空
自改向年年芳意長新遍綠野嬉遊醉眼莫負青春
張昇字杲卿韓城人第進士累官參知政事以

彰信軍節度使同中書門下平章事判許
州改鎮河陽以太子太師致仕贈司徒兼
侍中謚康節

離亭燕

一帶江山如畫風物向秋瀟灑水浸碧天何處斷霽

色冷光相射
蓼嶼荻花洲
掩映竹籬茅舍
雲際客
帆高挂烟外
酒旗低亞
多少六朝興廢事
盡入漁樵
閑話悵望倚層樓
寒日無言西下

謝

絳字希深富陽人舉進士歷官兵部員外郎擢知制誥判吏部流內銓太常禮院出知鄧州有集

夜行船

昨夜佳期初共鬢雲低翠翹金鳳尊前和笑不成歌
意偷傳眼波微送
草草不容成楚夢
漸寒深翠簾
霜重相看到斷腸時
月西斜畫樓鐘動

歐陽修

字永叔廬陵人第進士歷官禮部侍郎兼翰林侍讀學士拜樞密副使參知政事以太子少師致仕卒贈太子太師謚文忠有六一居士詞三卷

陳質齋云歐陽公詞多有與花間陽春相混亦有鄙褻之語
則其中當是仇人無名子所為也
羅長源云公嘗致意於詩為之本義溫柔寬厚所得深矣
今詞之淺近者前輩多謂是劉焯偽作
又云元豐中崔公度跋馮延巳陽春錄謂其間有誤入六

一詞者今柳三變詞亦有雜之平山集中
則其浮艷者殆亦非皆公少作也

摸魚兒

卷繡簾梧桐院落一霎雨添新綠小池閑立殘妝淺
向晚水紋如縠凝遠目恨人去寂寥鳳枕孤難宿倚
欄不足看燕拂風簷蜨翻露草兩兩鎮相逐 雙眉
蹙可惜年華婉婉西風初弄庭菊况伊家年少多情
未已難拘束那堪更趁涼景追尋甚處垂楊曲佳期
過盡但不說歸來多應忘了雲屏去時祝按後半闕
較他集未協疑有誤

采桑子

輕舟短棹西湖好綠水逶迤芳草長堤隱隱笙歌處
處隨 無風水面琉璃滑不覺船移微動漣漪驚起
沙禽掠岸飛

又

羣芳過後西湖好狼籍殘紅飛絮濛濛垂柳闌干盡
日風 笙歌散盡遊人去始覺春空垂下簾櫳雙燕
歸來細雨中

踏莎行

候館梅殘溪橋柳細草熏風暖搖征轡離愁漸遠漸

無窮迢迢不斷如春水 寸寸柔腸盈盈粉淚樓高
莫近危欄倚平蕪盡處是春山行人更在春山外

蝶戀花

越女採蓮秋水畔窄袖輕羅暗露雙金釧照影摘花
花似面芳心只共絲爭亂 鷓鴣灘頭風浪晚霧重
烟輕不見來時伴隱隱歌聲歸棹遠離愁引著江南
岸

又

小院深深門掩乍 一作亞寂寞珠簾畫閣重重下欲
近禁烟微雨罷綠楊深處秋千挂 傅粉狂遊猶未
捨不念芳時眉黛無人畫薄倖未歸春去也杏花零
落紅香謝

玉樓春

春山斂黛低歌扇暫解吳鉤登祖宴畫樓鐘動已魂
銷何況馬嘶芳草岸 青門柳色隨人遠望未斷時
腸已斷洛陽春色待君來莫到落花飛似霰

又

湖邊柳外樓高處望斷雲山多少路闌干倚遍使人
愁又是天涯初日暮 輕無管繫狂無數水畔飛花
風裏絮算伊渾似薄情郎去便不來來便去

又

西湖南北烟波闊風裏絲簧聲韻咽舞餘一作徐裙
帶綠雙垂酒入香腮紅一抹杯深不覺琉璃滑貪
看六么花十八明朝車馬各東西惆悵畫橋風與月

虞美人影

鶯愁燕苦春歸去寂寂花飄紅雨碧草綠楊歧路况
是長亭暮少年作客情難訴泣對東風無語目斷
兩三烟樹翠隔江淹浦

浪淘沙

把酒祝東風且共從容垂楊紫陌洛城東總是當時
攜手處遊遍芳叢聚散苦匆匆此恨無窮今年花
勝去年紅可惜一作料得明年花更好知與誰同

又

今日北池遊漾漾輕舟波光潋灩柳條柔如此春來
春又去白了人頭好妓好歌喉不醉難休勸君滿
滿酌金甌總使花時常病酒也是風流

浣溪沙

堤上遊人逐畫船拍堤春水四垂天綠楊樓一作梢
外出秋千白髮戴花君莫笑六么催拍盞頻傳人
生何處似尊前晁無咎云只一出字自是後人道不

到

又

紅粉佳人白玉盃
木蘭船穩棹歌催
綠荷風裏笑聲來
細雨輕烟籠草樹
斜橋曲水遶樓臺
夕陽高處畫屏開

越溪春

三月十三寒食日
春色遍天涯
越溪閨苑繁華地
傍禁垣珠翠烟霞
紅粉牆頭秋千影
裏臨水人家
歸來晚
駐香車銀箭透窗紗
有時三點兩點雨
霽朱門柳細風斜
沉麝不燒金鴨
玲瓏月照梨花

夜行船

滿眼東風飛絮催
行色短亭春暮
落花流水草連雲
看看是斷腸南浦
檀板未終人去
一作又去扁舟
在綠楊深處
手把金樽難為別
更那聽亂鶯疎雨

少年遊草

闌干十二獨凭春
晴碧遠連雲
千里萬里二月三月
行色苦愁人
謝家池上江淹浦
畔吟魄與離魂
那堪疎雨滴黃昏
更特地憶王孫
吳虎臣云不惟君復
聖俞二詞不及雖求諸唐人
温李集中殆與之為一
矣

南歌子

鳳髻金泥帶龍紋玉掌梳去來窗下笑相扶愛道畫眉深淺入時無
弄筆俚人久描花試手初等閑妨了繡工夫笑問雙鴛鴦字怎生書

臨江仙

柳外輕雷池上雨雨聲滴碎荷聲小樓西角斷虹明闌干倚處待得月華生
燕子飛來窺畫棟玉鈎垂下簾旌涼波不動簾紋平水精雙枕傍有墮釵橫

又

記得金鑾同唱第春風上國繁華如今薄宦老天涯十年岐路空負曲江花
聞說閩山通閩苑樓高不見君家孤城寒日等閑斜離愁難盡紅樹遠連霞

青玉案

一年春事都來幾早過了三之二綠暗紅嫣渾可事垂楊庭院暖風簾幙有箇人憔悴
買花載酒長安市又爭似家山見桃李不住東風吹客淚相思難表夢魂無據惟有歸來是

梅堯臣

字聖俞宣城人初以蔭為河南主簿歷鎮

安判官仁宗召試賜進士出身為國子監

直講遷都官員外郎有宛陵集

蘇幕遮 草

露隄平烟野杏亂碧萋萋雨後江天曉獨有庾郎年
最少窄地春袍嫩色宜相照 接長亭迷遠道堪怨
王孫不記歸期早落盡梨花春又了滿地殘陽翠色
和烟老

石延年 字曼卿宋州人補三班奉職累遷大理寺

丞通判海州終校理

燕歸梁

芳草年年惹恨幽想前事悠悠傷春傷別幾時休算
從古為風流 春山總把深勻翠黛千疊在眉頭不
知供得幾多愁更斜日凭危樓

司馬光 字君實夏縣人寶元初中進士甲科累官

資政殿學士尚書左僕射兼門下侍郎贈
太師温國公謚文正

阮郎歸

漁舟容易入深山仙家日日閑綺窗紗幌映朱顏相
逢醉夢間 松露冷海霞殷匆匆整棹還落花寂寂
水潺潺重尋此路難

王安石 字介甫臨川人舉進士熙寧初同中書門

下平章事封舒國公加司空卒贈太傅謚

曰文崇寧中追封舒王有臨川集詞一卷

珍做宋版印

桂枝香金陵懷古

登臨送目正故國晚秋天氣初肅千里澄江似練翠
峯如簇征帆去棹殘陽裏背西風酒旗斜矗蠹絲舟雲
淡星河鷺起圖畫難足念自昔豪華競逐歎門外
樓頭悲恨相續千古憑高對此謾嗟榮辱六朝舊事
隨流水但寒烟衰草凝綠至今商女時時猶唱後庭
遺曲

傷春怨夢中作

雨打江南樹一夜花開無數綠葉漸成陰下有遊人
歸路與君相逢處不道春將暮把酒祝東風且莫
恁匆匆去

范純仁

字堯夫仲淹子第進士累官尚書右僕射
兼中書侍郎贈開府儀同三司謚忠宣

鷓鴣天和韓持國

臘後春前暖律催日和風暖欲開梅公方結客尋佳
景我亦忘形趁酒杯添管籥續尊罍更闌秉燭未
能回清歡莫待相期約乘興來時便可來

詞綜卷五

宋詞七十首

晏幾道 二十二首

張先 二十七首

柳永 二十一首

晏幾道 字叔原，殊幼子，監穎昌許田鎮，有小山詞。

一卷

黃魯直云：叔原樂府，寓以詩人句法，精壯頓挫，能動搖人心。合者高唐洛神之流，下者不減桃葉團扇。陳質齋云：叔原詞在諸名勝中，獨可追逼花間高處。或過之。程叔微云：伊川聞誦晏叔原夢魂慣得無拘檢，又踏楊花過謝橋，笑曰：鬼語也。意亦賞之。

臨江仙

夢後樓臺高鎖，酒醒簾幕低垂。去年春恨却來時。落花人獨立，微雨燕雙飛。
記得小蘋初見，兩重心字羅衣。琵琶絃上說相思。當時明月在，曾照綵雲歸。

清商怨

庭花香信尚淺，最玉樓先暖。夢覺香衾江南依舊遠。迴文錦字暗剪，謾寄與也。應歸歸晚，要問相思天涯。

猶自短

點絳脣

明日征鞭又將南陌垂楊折自憐輕別拚得音塵絕
杏子枝邊倚徧闌干月依前缺去年時節舊事無
人說

又

妝席相逢旋勻紅淚歌金縷意中曾許欲共吹花去
長愛荷香柳色殷橋路留人住淡烟微雨好箇雙
棲處

虞美人

閑敲玉鐙隋堤路一笑開朱戶素雲凝澹月嬋娟門
外鴨頭春水木蘭船吹花拾蘂嬉遊慣天與相逢
晚一聲長笛倚樓時應恨不題紅葉寄相思

生查子

金鞍美少年去躍青驄馬縈係玉樓人繡被春寒夜
消息未歸來寒食梨花謝無處說相思背面秋千
下

採桑子

秋千散後朦朧月滿院人間幾處雕欄一夜風吹杏
粉殘昭陽殿裏春衣就金縷初乾莫信朝寒明日

花前試舞看

六么令

綠陰春盡飛絮遶香閣晚來翠眉宮樣巧把遠山學
一寸狂心未說已向橫波覺畫簾遮匝新翻曲妙暗
許閑人帶偷招 前度書多隱語意淺愁難答昨夜
詩有回文韻險還慵押都待笙歌散了記取留時霎
不消紅蠟閑雲歸後月在庭花舊欄角

又

雪殘風信悠颺春消息天涯倚樓新恨楊柳幾絲碧
還是南雲雁少錦字無端的寶釵瑤席彩絃聲裏擗
作尊前未歸客 遙想疎梅此際月底香英圻別後
誰繞前溪手揀繁枝摘莫道傷高恨遠付與臨風笛
儘堪愁寂花時往事更有多情箇人憶

清平樂

留人不住醉解蘭舟去一棹碧濤春水路過盡曉鶯
啼處 渡頭楊柳青青枝枝葉葉離情此後錦書休
寄畫樓雲雨無憑

又

春雲綠處又見歸鴻去側帽風前花滿路冶葉倡條
情緒 紅樓桂酒初開曾攜翠袖同來醉弄影蛾池

水短簫吹落殘梅

又

波紋碧皺曲水清明後折得疎梅香滿袖暗喜春紅
依舊歸來紫陌東頭金釵換酒銷愁柳影深深細
路花梢小小層樓

又

么絃寫意密絃聲碎書得鳳箋無限事猶恨春心
難寄臥聽疎雨梧桐雨餘淡月朦朧一夜夢魂何
處那回楊葉樓中

玉樓春

秋千院落重簾暮彩筆閑來題繡戶牆頭丹杏雨餘
花門外綠楊風後絮朝雲信斷知何處應作襄王
春夢去紫騮認得舊遊踪嘶過畫樓東畔路

又

採蓮時候慵歌舞永日閑從花裏度暗隨蘋末曉風
來直待柳梢斜月去停橈共說江頭路臨水樓臺
蘇小住細思巫峽夢回時不減秦源腸斷處

浪淘沙

小綠間長紅露蘂烟叢花開花落昔年同惟恨花前
攜手處往事成空山遠水重重一笑難逢已擗長

在別離中霜鬢知他從此去幾度春風

碧牡丹

翠袖疎紈扇涼葉催歸燕一夜西風幾處傷高懷遠
細菊枝頭開嫩香還徧月痕依舊庭院 事何限悵
望秋意晚離人鬢華將換靜憶天涯路比此情還短
試約鸞箋傳素期良願南雲應有新鴈

蝶戀花

碧玉高樓臨水住紅杏開時花底曾相遇一曲陽春
春已暮曉鶯聲斷朝雲去 遠水來從樓下度過盡
流波未得魚中素月細風尖垂柳渡夢魂長在分襟
處

又

喜鵲橋成催鳳駕天爲歡時乞與初涼夜乞巧雙蛾
加意畫玉鉤斜傍西南挂 分鈿擘釵涼葉下香袖
凭肩誰記當時話路隔銀河猶可借世間離恨何年
罷

又

醉別西樓醒不記春夢秋雲聚散真容易斜月半窗
還少睡畫屏間展吳山翠 衣上酒痕詩裏字點點
行行總是淒涼意紅燭自憐無好計夜寒空替人垂

淚

又

庭院碧苔紅葉遍金菊開時已近登高宴日日露荷
凋綠扇粉塘烟水澄如練試倚涼風醒酒面鴈字
來時恰向層樓見幾點護霜雲影轉誰家蘆管吹秋
怨

破陣子

柳下笙歌庭院花間姊妹秋千記得青樓當日事寫
向紅窗夜月前憑伊寄小蓮絳蠟等閑陪淚吳蠶
到了纏綿綠鬢能供多少恨未肯無情比斷絃今年
老去年

張

先字子野吳興人爲都官郎中有安陸集詞

一卷

李端叔云子野詞才不足而情有餘晁
无咎云子野與耆卿齊名而時以子野不
及耆卿然子野韻高是耆卿所乏處古
今詩話云有客謂子野曰人皆謂公張三
中卽心中事眼中淚意中人也公曰何不
目之爲張三影客不曉公曰雲破月來花
弄影嬌柔懶起簾壓捲花影柳徑無人墮

飛絮無影此余平生所得意也 天聖間
一時有兩張先皆字子野俱第進士其能
詩壽考悉同一博州人號張三影者是也
一吳興人見齊東野語胡應麟筆叢所載
如此

清平樂

屏山斜展帳卷紅綃半泥淺曲池飛海燕風度楊花
滿院 雲愁雨恨空深覺來一枕春陰隴上梅花落
盡江南消息沉沉

卜算子慢

溪山別意烟樹去程日落采蘋春晚欲上征鞅更掩
翠簾回面相盼惜彎彎淺黛長長眼奈畫閣歡遊也
學狂花亂絮輕散 水影橫池館對靜夜無人月高
雲遠一餉凝思兩眼淚痕還滿難遣恨私書又逐東
風斷縱夢澤層樓萬尺望湖城那見

木蘭花

西湖楊柳風流絕滿縷青春看贈別牆頭簌簌暗飛
花山外陰陰初落月 秦姬穠麗雲梳髮持酒聽歌
留晚發驪駒應亦解人情欲出重城嘶不歇

又邠州作

青銅貼水萍無數臨曉西湖春漲雨泥新輕燕面前
飛風慢落花衣上住紅裙空解烟蛾聚雲月却能
隨馬去明朝何處上高臺回認玉峯山下路

又去春自湖歸杭憶南園花已開有當時猶有

藥如梅之句今歲還鄉南園正盛復爲此詞
以寄意

去年春入芳菲國青藥如梅終忍摘欄邊徒欲說相
思綠臘密緘朱粉飾歸來故苑重尋覓花滿舊枝
心更惜鴛鴦從小自相雙若不多情頭不白

又乙卯吳興寒食

龍頭舴艋吳兒競筍柱鞦韆遊女並芳洲拾翠暮忘
歸秀野踏青來不定行雲去後遙山暝已放笙歌
池院靜中庭月色正清明無數楊花過無影

憶秦娥

參差竹吹斷相思曲情不足西北有樓窮遠目憶
茗溪寒影透清玉秋鴈南飛速菰草綠應下溪頭沙
上宿

慶春澤

飛閣危橋相倚人獨立東風滿衣輕絮還記憶江南
如今天氣正白蘋花遶堤漲流水寒梅落盡誰寄

方春意無窮青空千里愁草樹依依關城初閉對月
黃昏角聲傍烟起

山亭宴有美堂贈彥獻主人

宴堂永晝喧簫鼓倚青空畫欄紅柱玉瑩紫微人藹
和氣春融日煦故宮池館更樓臺約風月今宵何處
湖水動鮮衣競拾翠湖邊路落花蕩漾怨空樹曉
山靜數聲杜宇天意送芳菲正黯淡疎烟短雨新歡
寧似舊歡長此會散幾時還聚試爲挹飛雲問解相
思否

剪牡丹舟中聞雙琵琶

野綠連空天青垂水素色溶漾都淨柔柳搖搖墜輕
絮無影汀洲日落人歸脩巾薄袂擷香拾翠相競如
解凌波泊渚烟春暝綵縵朱索新整宿繡屏畫船
風定金鳳響雙槽彈出今古幽思誰省玉盤大小亂
珠迸酒上妝面花豔媚相並重聽盡漢妃一曲江空
月靜

好事近和毅夫內翰梅花

月色透橫枝短葉小葩無力北客一聲長笛怨江南
先得誰教強半臘前開多情爲春憶留取大家須
醉幸雨休風息

畫堂春

外湖蓮子長參差，霽山青處鷗飛。水天溶漾畫桡遲，人影鑑中移。
桃葉淺聲雙唱，杏紅深處輕衣。小荷障面避斜暉，分得翠陰歸。

踏莎行

衾鳳猶溫籠鸚尚睡，宿妝稀淡眉成字。映花避月上迴廊，珠裙摺摺輕垂地。
翠幙成波新荷貼，水紛紛烟絮低。還起重牆遶院更重門，春風無路通深意。

于飛樂

寶奩開菱鑑淨，一掬清蟾。新妝臉旋學花添，蜀紅衫雙繡。蝶裙縷鷓鴣，尋思前事小屏風。仍畫江南。怎空教草解宜男，柔桑暗又過春蠶。正陰晴天氣，更暝色相兼。幽期消息，曲房西碎月篩簾。

惜瓊花

汀蘋白若水碧，每逢花駐樂隨處。歡席別時攜手看，春色螢火而今飛破。秋夕河流如帶，窄任輕似葉。何計歸得，斷雲孤鷺，青山極樓上徘徊無盡相憶。

河滿子 陪杭守泛湖夜歸

溪女送花隨處沙鷗避，樂分行遊舸已如圖。障裏小屏猶畫瀟湘人面，新生酒豔日痕更欲春長。衣上

交枝鬪色釵頭比翼相雙片段落霞明水底風紋時
動妝光賓從夜歸無月千燈萬火湖塘

醉垂鞭 錢塘送祖擇之

酒面灑金魚吳娃唱吳潮上玉殿白麻書待君歸後
除勾留風月好平湖曉翠峯孤此景出關無西州
空畫圖

又

雙螭繡羅裙東池宴初相見朱粉不深勻閑花淡淡
春細看諸處好人人道柳腰身昨日亂山昏來時
衣上雲

謝池春慢 玉仙觀道中逢謝媚卿

繚牆重院間有流鶯到繡被掩餘寒畫閣明新曉朱
檻連空闌飛絮無多少徑莎平池水渺日長風靜花
影閑相照塵香拂馬逢謝女城南道秀豔過施粉
多媚生輕笑鬪色鮮衣薄碾玉雙蟬小歡難偶春過
了琵琶流怨都入相思調

減字木蘭花 贈伎

垂螺近額走上紅裙初趁拍只恐驚飛擬倩游絲惹
住伊文鴛繡履去似風流塵不起舞徹梁州頭上
宮花顫未休

醉落魄 美人吹笛

珍做宋版印

雲輕柳弱內家髻子新梳掠生香真色人難學橫管
孤吹月淡天垂幕 朱脣淺破櫻桃萼倚樓人在闌
干角夜寒指冷羅衣薄聲入霜林簌簌驚梅落

師師令 贈美人

香鈿寶珥拂菱花如水學妝皆道稱時宜粉色有天
然春意蜀綵衣長勝未起縱亂霞垂地 都城池苑
誇桃李問東風何似不須回扇障清歌脣一點小於
朱藥正值殘英和月墜寄此情千里

繫裙腰

惜霜澹照夜雲天朦朧影畫勾闌人情縱似長情月
算一年年又能得幾番圓 欲寄西江題葉字流不
到五亭前東池始有荷新綠尚小如錢問何日藕幾
時蓮

漁家傲

巴子城頭青草暮巴山重疊相逢處燕子占巢花脫
樹杯且舉瞿塘水闊舟難渡 天外吳門清霽路君
家正在吳門住贈我柳枝情幾許春滿縷爲君將入
江南去

碧牡丹

步障搖紅綺曉月墮沉烟砌緩板香檀唱徹伊家新
製怨入眉頭斂黛峯橫翠芭蕉寒雨聲碎鏡華翳
閑照孤鸞戲思量去時容易鈿合瑤釵至今冷落輕
棄望極藍橋但暮雲千里幾重山幾重水道山清話
云晏文獻爲京兆辟張先爲通判新納侍兒公甚屬
意先能爲詩詞公雅重之每張來令侍兒出侑觴往
往歌于野所爲之詞其後王夫人寢不容公卽出之
一日于野至公與之飲于野作此詞令營妓歌之至
末句公聞之憮然曰人生行樂耳何自苦如此亟命
于宅庫支錢若干復取前所出侍兒既來夫人亦不
復誰何也

青門引

乍暖還輕冷風雨晚來方定庭軒寂寞近清明殘花
中酒又是去年病樓頭畫角風吹醒入夜重門靜
那堪更被明月隔牆送過秋千影

生查子彈箏

含羞整翠鬢得意頻相顧雁柱十三絃一一春鶯語
嬌雲容易飛夢斷知何處深院鎖黃昏陣陣芭蕉
雨

柳

永初名三變字耆卿樂安人景祐元年進士

官至屯田員外郎有樂章集九卷

晁無咎云世言柳耆卿曲俗非也如漸霜
風淒緊關河冷落殘照當樓此真不減唐
人語李端叔云耆卿詞鋪敘展衍備足無
餘較之花間所集韻終不勝 孫敦立云
耆卿詞雖極工然多雜以鄙語 葉少蘊
云嘗見一西夏歸朝官云凡有井水飲處
卽能歌柳詞 吳虎臣云仁宗留意儒雅
深斥浮艷虛華之文三變好爲淫冶之曲
傳播四方嘗有鶴冲天詞云忍把浮名換
了淺斟低唱及臨軒放榜時人語之曰且
去淺斟低唱何要浮名 劉潛夫云耆卿
有教坊丁大使意 黃叔暘云耆卿長于
纖豔之詞然多近俚俗 陳質齋云柳詞
格不高而音律諧婉詞意妥帖承平氣象
形容曲盡尤工于羈旅行役

鬪百花

照色韶光明媚輕靄低籠芳樹池塘淺蘸烟蕪簾幙
閑垂風絮春困厭厭拋擲鬪草工夫冷落踏青心緒
終日扃朱戶 遠恨綿綿淑景遲遲難度年少傅粉

依前醉眠何處深院無人黃昏乍折軟韉空鎖滿庭
花雨

女冠子

斷烟殘雨灑微涼生軒戶動清籟蕭蕭庭樹銀河濃
淡華星明滅輕雲時度莎階寂靜無覩幽蛩切切秋
吟苦疎篁一徑流螢幾點飛來又去對月臨風空
恁無眠耿耿暗想舊日牽情處綺羅叢裏有人人那
回飲散略略曾諧鴛侶因循忍便睽阻相思不得長
相聚好天良夜無端惹起千愁萬緒

雨霖鈴

寒蟬凄切對長亭晚驟雨初歇都門帳飲無緒方留
戀處蘭舟催發執手相看淚眼竟無語凝咽念去去
千里烟波暮靄沉沉楚天闊多情自古傷離別更
那堪冷落清秋節今宵酒醒何處楊柳岸曉風殘月
此去經年應是良辰好景虛設便總有千種風情更
與何人說

傾盃樂

木落霜洲鴈橫烟渚分明畫出秋色暮雨乍歇小楫
夜泊宿葦村山驛何人月下臨風處起一聲羌笛離
緒萬端聞岸草切切蛩吟如織為憶芳容別後水

遙山遠何計憑鱗翼想繡閣深沉爭知憔悴損天涯
行客楚峽雲歸高陽人散寂寞狂蹤跡望京國空目
斷遠峯凝碧

卜算子慢

江楓漸老汀蕙半凋滿目敗紅衰翠楚客登臨正是
暮秋天氣引疎砧斷續殘陽裏對晚景傷懷念遠新
愁舊恨相繼脈脈人千里念兩處風情萬重烟水
雨歇天高望斷翠峯十二儘無言誰會憑高意縱寫
得離腸萬種奈歸鴻誰寄

少年遊

參差烟樹霸陵橋風物盡前朝衰楊古柳幾經攀折
憔悴楚宮腰夕陽閑淡秋光老離思滿蘅臯一曲
陽關斷腸聲盡獨自上蘭橈

夜半樂

凍雲黯淡天氣扁舟一葉乘興離江渚渡萬壑千巖
越溪深處怒濤漸息樵風乍起更聞商旅相呼片帆
高舉泛畫鷁翩翩過南浦望中酒旆閃閃一簇烟
村數行霜樹殘日下漁人鳴榔歸去敗荷零落衰楊
掩映岸邊兩兩三三浣紗遊女避行客含羞相笑語
到此因念繡閣輕拋浪萍難駐歎後約丁寧竟何

據慘離懷空恨歲晚歸期阻凝淚眼杳杳神京路斷
鴻聲遠長天暮

玉蝴蝶

望處雨收雲斷凭欄悄悄目送秋光晚景蕭疎堪動
宋玉悲涼水風輕蘋花漸老月露冷梧葉飄黃遣情
傷故人何在烟水茫茫難忘文期酒會幾辜風月
屢變星霜海闊天遙未知何處是瀟湘念雙燕難憑
遠信指暮天空識歸航黯相望斷鴻聲裏立盡斜陽

望遠行雪

長空降瑞寒風剪淅淅瑤華初下亂飄僧舍密灑歌
樓迤邐漸迷鴛瓦好是漁人披得一簑歸去江上晚
來堪畫滿長安高却旗亭酒價幽雅乘興最宜訪
戴泛小棹越溪瀟灑皓鶴奪鮮白鷗失素千里廣鋪
寒野須信幽蘭歌斷同雲收盡別有瓊臺瑤榭放一
輪明月交光清夜

八聲甘州

對蕭蕭暮雨灑江天一番洗清秋漸霜風淒緊關河
冷落殘照當樓是處紅衰綠減苒苒物華休惟有長
江水無語東流不忍登高臨遠望故鄉渺邈歸思
難收數年來蹤跡何事苦淹留想佳人妝樓長望誤

幾回天際識歸舟爭知我倚闌干處正恁凝愁

珍做宋版印

安公子

遠岸收殘雨雨殘稍覺江天暮拾翠汀洲人寂靜立
雙雙鷗鷺望幾點漁燈掩映蒹葭浦停畫橈兩兩舟
人語道去程今夜遙指前村烟樹遊宦成羈旅短
檣吟倚閑凝竚萬水千山迷遠近想鄉關何處自別
後風亭月榭孤歡聚剛斷腸惹得離情苦聽杜宇聲
聲勸人不如歸去

雪梅香

景蕭索危樓獨立一作倚面晴空動悲秋情緒當時
宋玉應同漁市孤烟裊寒碧水村殘葉舞愁紅楚天
闊浪浸斜陽千里溶溶臨風想佳麗別後愁顏鎮
斂眉峯可惜當年頓乖雨跡雲蹤雅態妍姿正歡洽
落花流水忽西東無繆恨相思意盡分付征鴻

婆羅門令

昨宵裏恁和衣睡今宵裏又恁和衣睡小飲歸來初
更過醺醺醉中夜後何事還驚起霜天冷風細細
觸疎窗閃閃燈搖曳空牀展轉重追想雲雨夢任欹
枕難繼寸心萬緒咫尺千里好景良天彼此空有相
憐意未有相憐計

西平樂

盡日憑高寓目脈脈春情緒嘉景清明漸近時節輕
寒乍暖天氣才晴又雨烟光澹蕩裝點平蕪遠樹黯
凝眸臺榭好鶯燕語正是和風麗日幾許繁紅嫩
綠雅稱嬉遊去奈阻隔尋芳伴侶秦樓鳳吹楚臺雲
約空悵望在何處寂寞韶光暗度可堪向晚村落聲
聲杜宇

陽臺路

楚天晚墜冷風敗葉疎紅零亂冒征塵匹馬區區愁
見水遙山遠追念年時正恁鳳幃倚香偎煖嬉遊慣
又豈知前歡雲雨分散此際空勞回首望帝里難
收淚眼暮烟衰草算暗鎖路岐無限今宵又依前寄
宿甚處葦村山館寒燈畔夜厭厭憑何消遣

二郎神

炎光初謝過暮雨芳塵輕灑乍露冷風清庭戶爽天
如水玉鉤遙挂應是星娥嗟久阻敘舊約鸞輪欲駕
極目處微雲暗度耿耿銀河高瀉閑雅須知此景
古今無價運巧思穿鍼樓上女擡粉面雲鬟相亞鈿
合金釵私語處算誰在回廊影下願天上人間占得
歡娛年年今夜

訴衷情近

雨晴氣爽竚立江樓望處澄明遠水生光重疊暮山聳翠遙想斷橋幽徑隱隱漁村向晚孤烟起
裏脈脈朱欄靜倚黯然情緒未飲先如醉愁無際暮雲過了秋風老盡故人千里竟日空凝睇

竹馬子

登孤壘荒涼危亭曠望靜臨烟渚對雌霓挂雨雄風拂檻微收煩暑漸覺一葉驚秋殘蟬噪晚素商時序
覽景想前歡指神京非霧非烟深處
新愁易積故人難聚憑高盡日凝竚贏得銷魂無語極目霽靄霏微斷鴉零亂蕭索江城暮南樓畫角又
逐殘陽去

玉山枕

驟雨新霽蕩原野清如洗斷霞散彩殘陽倒影天外雲峯數朶相倚露莎烟芰滿池塘見次第幾番紅翠
當是時河朔飛觴遊炎蒸想風流堪繼
清風起動簾幙生秋氣畫樓晝寂蘭堂夜靜舞艷歌姝漸任羅綺訟閑時泰足風情便爭奈雅歡都廢省
教成幾闋新歌盡新聲好尊前重理

河傳

淮岸漸晚圓荷向背芙蓉深淺仙娥畫舸露影紅芳
交亂難分花與面 采多乍覺輕舸滿呼歸伴急槳
烟村遠隱隱棹歌漸被蒹葭遮斷曲終人不見

木蘭花慢清明

垢桐花爛熳乍疎雨洗清明正艷杏燒林細桃繡野
芳景如屏傾城盡尋勝賞驟雕鞍紺幃出郊坰風暖
繁絃脆管萬家競奏新聲 盈盈鬪草踏青人艷冶
遞逢迎向路傍往往遺簪墜珥珠翠縱橫歡情對佳
麗地任金罍罄竭玉山傾揅却明朝永日畫堂一枕
春醒

詞綜卷五

詞綜卷六

宋詞六十四首

蘇軾十五首

黃庭堅四首

秦觀十九首

晁補之十五首

張耒三首

陳師道二首

李彥二首

李之儀四首

蘇軾

字子瞻眉山入嘉祐初試禮部第一歷官翰林學士紹聖初安置惠州徙昌化元符

初北還卒於常州高宗卽位贈資政殿學

士復贈太師謚文忠有東坡居士詞二卷

晁无咎云居士詞人謂多不諧音律然橫

放傑出自是曲子內縛不住者 陳無已

云東坡以詩爲詞如教坊雷大使之舞雖

極天下之工要非本色 陸務觀云世言

東坡不能歌故所作樂府詞多不協晁以

道謂紹聖初與東坡別于汴上東坡酒酣

自歌古陽關則公非不能歌但豪放不喜

裁剪以就聲律耳又云東坡詞歌之曲終

覺天風海雨逼人 周輝云豈無去國流

離之思殊覺哀而不傷 吹劍續錄云東

坡在玉堂日有幕士善歌因問我詞比柳
者卿何如對曰柳郎中詞只好十七八女
孩兒按執紅牙拍歌楊柳岸曉風殘月學
士詞須關西大漢執鐵綽板唱大江東去
公爲之絕倒 胡致堂云詞曲至東坡一
洗綺羅香澤之態擺脫綢繆宛轉之度使
人登高望遠舉首高歌逸懷浩氣超乎塵
垢之外於是花間爲卑隸而耆卿爲輿臺
矣 張叔夏云東坡詞清麗舒徐處高出
人表周秦諸人所不能到

醉翁操琴曲

琅然清園誰彈響空山無言惟翁醉中和其天月明
風露娟娟人未眠荷蕢過山前曰有心也哉此賢
醉翁笑詠聲和流泉醉翁去後空有朝吟夜怨山有
時而童巔水有時而回川思翁無歲年翁今爲飛仙
此意在人間試聽徽外三兩絃

行香子

攜手江村梅雪飄裙情何限處處消魂故人不見舊
曲重聞向望湖樓孤山寺湧金門 尋常行處題詩
千首繡羅衫與拂輕塵別來相憶知有何人有湖中

月江邊柳隴頭雲

哨遍

睡起畫堂銀蒜押簾珠幕雲垂地初雨歇洗出碧羅
天正溶溶養花天氣一霎晴風迴芳草榮光浮動卷
皺銀塘水方杏靨勻酥花鬢吐繡園林翠紅排比見
乳燕梢蜨過繁枝忽一綫爐香惹遊絲晝永人閑獨
立斜陽晚來情味便攜將佳麗乘興深入芳菲裏
撥胡琴語輕攏慢撚總伶俐看緊約羅裙急趣檀板
霓裳入破驚鴻起顰月臨眉醉霞橫臉歌聲悠颺雲
際任滿頭紅雨落花飛漸鳩鵲樓西玉蟾低尚徘徊
未盡歡意君看今古悠悠浮幻人間世這些百歲光
陰幾日三萬六千而已醉鄉路穩不妨行但人生要
適情耳

賀新涼

乳燕飛華屋悄無人槐陰轉午晚涼新浴手弄生綃
白團扇扇手一時似玉漸困倚孤眠清熟簾外誰來
推繡戶枉教人夢斷瑤臺曲又却是風敲竹石榴
半吐紅巾蹙待浮花浪蘂都盡伴君幽獨穠艷一枝
細看取芳意千重似束又恐被秋風驚綠若待得君
來向此花前對酒不忍觸共粉淚兩簌簌胡元任云

詞

綜卷六

一一中華書局聚

托意高遠

水龍吟 和章質夫楊花韻

似花還似非花也無人惜從教墜拋家傍路思量却似無情有思縈損柔腸困酣嬌眼欲開還閉夢隨風萬里尋郎去處又還被鶯呼起不恨此花飛盡恨西園落紅難綴曉來雨過遺踪何在一池萍碎春色三分二分塵土一分流水細看來不是楊花點點是離人淚

又黃州夢過樓霞樓

小舟橫截春江臥看翠壁紅樓起雲間笑語使君高會佳人半醉危柱哀絃艷歌餘響遏雲縈水念故人老大風流未減獨回首烟波裏推枕惘然不見但空江月明千里五湖聞道扁舟歸去仍攜西子雲夢南州武昌南岸昔遊應記料多情夢裏端來見我也參差是

浣溪沙 遊蘄水清泉寺

山下蘭芽短浸溪松間沙路淨無泥瀟瀟暮雨子規啼誰道人生難再少君看流水尚能西休將白髮唱黃雞

卜算子 鴈

缺月挂疎桐，漏斷人初定。一作靜時見幽人獨往來
縹緲孤鴻影，驚起却回頭。有恨無人省，揀盡寒枝
不肯栖。寂寞沙洲冷。黃魯直云語意高妙似非喫烟
火食人語

江城子

天涯流落思無窮，既相逢，却匆匆。攜手佳人，和淚折
殘紅。爲問東風餘幾許，春縱在，與誰同。隋堤三月
水溶溶。背歸鴻，去吳中。回望彭城，清泗與淮通。寄我
相思千點淚，流不到，楚江東。

念奴嬌 赤壁懷古

大江東去，浪聲沉千古。風流人物，故壘西邊，人道是
三國孫吳。赤壁亂石崩雲，驚濤掠岸，捲起千堆雪。江
山如畫，一時多少豪傑。遙想公瑾當年，小喬初嫁
了，雄姿英發。羽扇綸巾，談笑間檣櫓灰飛烟滅。故國
神遊多情應是笑我，生華髮。人間如寄一尊還酹江
月。按他本浪聲沉作浪淘盡與調未協孫吳作周郎
犯下公瑾字崩雲作穿空掠岸作拍岸又多情應是
笑我生華髮作多情應笑我早生華髮益非今從容
齋隨筆所載黃魯直手書本更正至于小喬初嫁宜
句絕了字屬下句乃合

蝶戀花

春事闌珊芳草歇客裏風光又過清明節小院黃昏
人憶別落花處處聞啼鴉咫尺江山分楚越目斷
魂消應是音塵絕破夢五更心欲折角聲吹落梅花
月

如夢令 有寄

爲向東坡傳語人在畫一作玉堂深處別後有誰來
雪壓小橋無路歸去歸去江上一犁春雨

昭君怨

誰作桓伊三弄驚破綠窗幽夢新月與愁烟滿江天
欲去又還不去明日落花飛絮飛絮送行舟水東
流

點絳脣 重九

不用悲秋今年身健還高宴江村海甸總作空花觀
尚想橫汾蘭菊紛相半樓船遠白雲飛亂空有年
年鴈

採桑子 潤州多景樓與孫巨源遇

多情多感仍多病多景樓中樽酒相逢樂事回頭一
笑空 停杯且聽琵琶語細撚輕攏醉臉春融斜照
江天一抹紅

黃庭堅

字魯直分寧人舉進士元祐初爲校書郎遷集賢校理擢起居舍人追謚文節有山谷詞二卷

晁无咎云魯直小詞固高妙然不是當行家語

減字木蘭花

中秋無雨醉送月銜西嶺去笑口須開幾度中秋見月來
前年江外兒女傳杯兄翁會此夜登樓小謝清吟慰白頭

醜奴兒令

櫻桃著子如紅豆不管春歸聞道開時蜂惹香鬚螻惹衣
樓臺燈火明珠翠酒戀歌迷醉玉東西少箇人人暖被攜

念奴嬌

斷虹霽雨淨秋空山染修眉新綠桂影扶疎誰便道
今夕清輝不足萬里清天姮娥何處駕此一輪玉寒光零亂爲誰偏照醺醺
年少從我追遊晚城幽徑遶張園森木共倒金荷家萬里難得樽前相屬老子
平生江南江北最愛臨風曲孫郎微笑坐來聲歡霜竹

虞美人宜州見梅作

天涯也有江南信，梅破知春近。夜闌風細得香遲，不道曉來開遍向南枝。玉臺弄粉花應妬，飄到眉心住。生平生箇裏，願盃深去國十年老，盡少年心。

秦

觀字少游高郵人登第後蘇軾薦於朝除太

學博士遷正字兼國史院編修官坐黨籍

徙徽宗立放還至藤州卒有淮海詞三卷

晁无咎云近來作者皆不及少游如斜陽

外寒鴉數點流水遶孤村雖不識字人亦

知是天生好言語 蔡伯世云子瞻辭勝

乎情者卿情勝乎辭辭情相稱者惟少游

而已 張綆云少游多婉約子瞻多豪放

當以婉約為主 釋覺範云少游小詞奇

麗詠歌之想見其神情在絳闕道山之間

葉少蘊云少游樂府語工而入律知樂

者謂之作家子瞻戲云山抹微雲秦學士

露花倒影柳屯田微以氣格為病也

滿庭芳

山抹微雲天粘衰草畫角聲斷譙門暫停征棹聊共引離尊多少蓬萊舊事空回首烟靄紛紛斜陽外寒

鴉數點流水遶孤村
消魂當此際香囊暗解羅帶
輕分謾贏得青樓薄倖名存此去何時見也襟袖上空染啼痕傷情處高城望斷燈火已黃昏

又

晚色雲開春隨人意驟雨方過還晴高臺芳樹飛燕蹴紅英舞困榆錢自落秋千外綠水橋平東風裏朱門映柳低按小秦箏多情行樂處珠鈿翠蓋玉纒紅纓漸酒空金盃花困蓬瀛豆蔻梢頭舊恨十年夢屈指堪驚凭欄久疎烟淡日寂寞下蕪城

望海潮 洛陽懷古

梅英疎淡冰漸溶洩東風暗換年華金谷俊遊銅駝巷陌新晴細履平沙長記誤隨車正絮翻蝶舞芳思交加柳下桃蹊亂分春色到人家西園夜飲鳴笳有華燈礙月飛蓋妨花蘭苑未空行人漸老重來事堪嗟嗟烟暝酒旗斜但倚樓極目時見棲鴉無奈歸心暗隨流水到天涯

如夢令

遙夜月明如水風緊驛亭深閉夢破鼠窺燈霜送曉寒侵被無寐無寐門外馬嘶人起

生查子

詞

綜

卷六

五
中華書局聚

眉黛遠山長新柳開青眼樓閣斷霞明羅幙春寒淺
盃嫌玉漏遲燭厭金刀剪月色忽飛來花影和簾
卷

浣溪沙

漠漠輕寒上小樓曉陰無賴似窮秋淡烟流水畫屏
幽自在飛花輕似夢無邊絲雨細如愁寶簾閑挂
小銀鈎

減字木蘭花

天涯舊恨獨自淒涼人不問欲見迴腸斷續薰爐小
篆香 黛蛾長斂任是東風吹不展困倚危樓過盡
飛鴻字字愁

憶秦娥

暮雲碧佳人不見愁如織愁如織兩行征鴈數聲羌
笛 錦書難寄西飛翼無言只是空相憶空相憶紗
窗月淡影雙人隻

阮郎歸

滿天風雨破寒初燈殘庭院虛麗譙吹徹小單于迢
迢清夜徂 鄉夢斷旅情孤崢嶸歲又除衡陽猶有
鴈傳書郴陽和鴈無

好事近 夢中作

春路雨添花花動一山春色行到小橋深處有黃鸝
千百飛雲當面化龍蛇天矯轉空碧醉臥古藤陰
下了不知南北

畫堂春

東風吹柳日初長雨餘芳草斜陽杏花零亂燕泥香
睡損紅妝寶篆烟消龍鳳畫屏雲鎖瀟湘暮寒初
透薄羅裳無限思量

鵲橋仙

纖雲弄巧飛星傳恨銀漢迢迢暗度金風玉露一相
逢便勝却人間無數柔情似水佳期如夢忍顧鵲
橋歸路兩情若是久長時又豈在朝朝暮暮

虞美人

高城望斷塵如霧不見連驂處夕陽村外小灣頭只
有柳花無數送歸舟瓊枝玉樹頻相見只恨離人
遠欲將幽恨寄青樓爭奈無情江水不西流

踏莎行 郴州旅舍

霧失樓臺月迷津渡桃源望斷無尋處可堪孤館閉
春寒杜鵑聲裏斜陽暮驛寄梅花魚傳尺素砌成
此恨無重數郴江幸自遶郴山爲誰流下瀟湘去釋
天隱云末二句從沅湘日夜東流去不爲愁人住少

時變化來 黃山谷云此詞高絕但斜陽暮三字爲
重犯耳又云極似劉夢得楚蜀間語 胡元任云子
瞻絕愛尾兩句自書于扇曰少游已矣雖萬身何贖

江城子

西城楊柳弄春柔動離憂淚難收猶記多情曾爲繫
歸舟碧野朱橋當日事人不見水空流 韶華不爲
少年留恨悠悠幾時休飛絮落花時候一登樓便做
春江都是淚流不盡許多愁

八六子

倚危亭恨如芳草萋萋剗盡還生念柳外青驄別後
水邊紅袂分時愴然暗驚 無端天與娉婷夜月一
簾幽夢春風十里柔情怎奈何 一作向歡娛漸隨流
水素絃聲斷翠綃香減那堪片片飛花弄晚濛濛殘
雨籠晴正銷凝黃鸝又啼數聲

金明池

瓊苑金池青門紫陌似雪楊花滿路雲日淡天低晝
永過三點兩點細雨好花枝半出牆頭似悵望芳草
王孫何處更水遶人家橋當門巷燕燕鶯鶯飛舞
怎得東君長爲主把綠鬢朱顏一時留住住佳人唱金
衣莫惜才子倒玉山休訴况春來倍覺傷心念故國

情多新年愁苦縱寶馬嘶風紅塵拂面也只一作則
尋芳歸去

水龍吟

小樓連苑橫空下窺繡轂雕鞍驟疎簾半捲單衣初
試清明時候破暖輕風弄晴微雨欲無還有賣花聲
過盡垂楊院落紅成陣飛鴛鴦玉珮丁東別後悵
佳期參差難又名韁利鎖天還知道和天也瘦花下
重門柳邊深巷不堪回首念多情但有當時皓月照
人依舊

南柯子贈陶心兒

玉漏迢迢盡銀潢淡淡橫夢回宿酒未全醒已被鄰
雞催起怕天明臂上妝猶在襟間淚尚盈水邊燈
火漸人行天外一鈎殘月照三星高齋詩話云少游
在蔡州與官奴婁婉字東玉者甚密贈之詞云小樓
連苑橫空又云玉珮丁東別後者是也又贈陶心兒
詞云天外一鈎橫月帶三星謂心字也

晁補之

字无咎鉅野人舉進士元祐初除秘書省

正字遷校書郎以秘閣校理通判揚州召

還爲著作郎坐黨籍徙大觀未知泗州卒

有雞助集詞一卷

陳質齋云无咎嘗云今代詞手惟秦七黃九然兩公之詞亦自有不同若无咎佳者固未多遜也

滿江紅

東武城南新堤固漣漪初溢隱隱遍長陵高阜臥紅堆碧枝上殘花吹盡也與君試向江邊覓問向前猶有幾多春三之一官裏事何時畢風雨外無多日相將泛曲水滿城爭出不見蘭亭修禊事當時座上皆豪逸到如今修竹滿山陰空陳迹

臨江仙

信州作

謫宦江城無屋買殘僧野寺相依松間藥白竹間衣水窮行到處雲起坐看時一箇幽禽緣底事苦來醉耳邊啼月斜西院愈聲悲青山無限好猶道不如歸

又

綠暗汀洲三月暮落花風靜帆收垂楊低映木蘭舟半篙春水滑一段夕陽愁灞水橋東回首處美人新上簾鉤青鸞無計入紅樓行雲歸楚峽飛夢到揚州

永遇樂 東臯寓居

一珍做宋版印

松菊堂深芰荷池小長夏清暑燕引雛還鳩呼婦往
人靜郊原趣麥天已過薄衣輕扇試起遶園徐步聽
衡宇欣欣童稚共說夜來初雨 蒼苔徑裏紫葳枝
上數點幽花垂露東里催鋤西鄰助餉相戒清晨去
斜川歸興條然滿目回首帝鄉何處只愁恐輕鞍犯
夜灞陵舊路

摸魚兒

買陂塘旋栽楊柳依稀淮岸湘浦東臯雨足輕痕漲
沙觜鷺來鷗聚堪愛處最好是一川夜月光流渚無
人自舞任翠幕張天柔茵藉地酒盡未能去 青綾
被休憶金閨故步儒冠曾把身誤弓刀千騎成何事
荒了邵平瓜圃君試覷滿青鏡星星鬢影今如許功
名浪語便做得班超封侯萬里歸計恐遲暮

憶少年

無窮官柳無情畫舸無根行客南山尚相送只高城
人隔 罨畫園林溪紺碧算重來盡成陳迹劉郎鬢
如此况桃花顏色

下水船

上客驪駒繫驚喚銀餅睡起困倚妝臺盈盈正解羅
髻鳳釵墜繚繞金盤玉指巫山一段雲委 半窺鏡

向我橫秋水斜領花枝交鏡裏淡拂鉛華匆匆自整
羅綺斂眉翠雖有悵悵密意空作江邊解珮能改齋
漫錄廖明略與无咎同登科明略所游田氏麗姝也
一日明略邀无咎晨過田氏田遠起對鑑理髮且盼
且語草草妝掠以與客對无咎以明略故有意而莫
傳也因賦下水船一闋

滿庭芳赴信日舟中別次膺十二叔

鷗起蘋中魚驚荷底畫船天上來時翠灣紅渚宛似
武陵迷更晚青山更好孤雲帶遠雨絲垂清歌裏金
尊未掩誰使動分攜 竹林高晉阮阿咸瀟散猶愧
風期便棄官終隱釣叟苔磯縱是冥鴻雲外應念我
垂翼低飛新詞好他年認取天際片帆歸

迷神引貶玉溪對江山山作

黯黯青山紅日暮浩浩大江東注餘霞散綺回向烟
波路使人愁長安遠在何處幾點漁燈小迷近塢一
片客帆低傍前浦 暗想平生自悔儒冠誤覺阮途
窮歸心阻斷魂縈目一千里傷平楚怪竹枝歌聲聲
怨為誰苦猿鳥一時啼驚鳥喚燭暗不成眠聽津鼓

古陽關寄無斁八弟宰寶應

衰草蛩吟咽暗柳螢飛滅空庭雨過西風緊飄黃葉

卷書帷寂靜對此傷離別重感數中秋數日又圓月
沙觜檣竿上淮水闊有飛鳧客詞珠玉氣水雪且
莫教皓月照影驚華髮問幾時清樽夜景共佳節
好事近南都寄歷下人

絲管鬧南湖湖上醉遊時晚獨看山橋官柳淚無言
偷滿坐中誰唱解愁詞紅妝勸金盞物是奈人非
是負東風心眼

水龍吟吟始去齊路逢次膺叔感別敘舊

去年暑雨鉤盤夜闌睡起同征轡今年芳草齊河古
岸扁舟同艤萍梗孤蹤夢魂浮世別離常是念當時
綠鬢狂歌痛飲今憔悴東風裏此去濟南爲說道
愁腸不醒猶醉多情北渚兩行烟柳一湖春水還唱
新聲後人重到應悲桃李待歸時攬取庭前皓月也
應堪寄

惜奴嬌

歌闋瓊筵暗失金貂侶說衷腸丁寧囑付棹舉帆開
黯行色秋將暮欲去時却回高城已暮漁火烟村
但觸目傷離緒此情向阿誰分訴那裏思量爭知我
思量苦最苦睡不著西風夜雨

鬪百花

小小盈盈珠翠憶得眉長眼細曾共映花低語已解
傷春情意重向溪堂臨風看舞梁州依舊照人秋水
轉更添姿媚與問階上簾錢時節記微笑但把纖
腰向人嬌倚不見還休誰教見了厭厭還是向來情
味

調笑西子

腸斷越江岸越女江頭紗自浣天然玉貌鉛紅淺
自弄芙蓉日晚紫騮嘶去猶回眄笑入荷花不見

張

耒字文潛淮陰人第進士歷官起居舍人以

直龍圖閣知潤州坐黨籍謫官晚監南嶽

廟主管崇福宮建炎初贈集英殿修撰有

宛丘集

風流子

亭臯木葉下重陽近又是搗衣秋奈愁入庾腸老侵
潘鬢謾簪黃菊花也應羞楚天晚白蘋烟盡處紅蓼
水邊頭芳草有情夕陽無語鴈橫南浦人倚西樓

玉容知安否香箋共錦字兩處悠悠空恨碧雲離合
青鳥沉浮向風前懊惱芳心一點寸眉兩葉禁甚閑
愁情到不堪言處分付東流

少年遊

含羞倚醉不成歌，纖手掩香羅。偃花映燭，偷傳深意，酒思入橫波。
看朱成碧，心迷亂，脈脈斂雙蛾。相見時稀，隔別多。又春盡，奈愁何。

秋藥香

簾幙疎疎風透，一線香飄。金獸朱欄倚遍，黃昏後，廊上月華如晝。
別離滋味濃如酒，著人瘦。此情不及，牆東柳，春色年年依舊。

陳師道

字履常，一字無已，彭城人。元祐初，以蘇軾

等薦，爲徐州教授。遷太學博士，終秘書省

正字。有《後山集》、《長短句》二卷。

胡元任云：《後山自謂他文未能及人，獨於詞不減秦七、黃九，其自矜如此。

菩薩蠻

哀箏一弄湘江曲，聲聲寫盡湘波綠。纖指十三絃，細將幽恨傳。
當筵秋水慢，玉柱斜飛鴈。彈到斷腸時，春山眉黛低。

減字木蘭花 晁無咎出小鬟佐飲

娉娉嫋嫋芍藥枝，頭紅樣。一作玉小舞袖低迴。一作

遲遲。心到郎邊客已知。金尊玉。一作當筵舉酒勸。

我花前千萬壽，莫莫休休。白髮簪花我自羞。

李

鴈字方叔華山人鄉舉試禮部不遇絕意進
取定居長社有月巖集

清平樂

落梅鳴咽黯澹城頭月吹滿江天驚夢蝶喚起畫樓
傷別 簾風輕觸銀鈎梧桐玉露新秋底事瑣窗深
夜素娥長伴人愁

虞美人

玉闌干外清江浦渺渺天涯雨好風如扇雨如簾時
見岸花汀草漲痕添 青林枕上關山路臥想乘鸞
處碧蕪千里思悠悠惟有霎時涼夢到南州

李之儀

字端叔無棣人歷樞密院編修官通判原
州徽宗初提舉河東常平坐爲范純仁遺

表作行狀編管太平遂居姑熟久之徙唐
州終朝請大夫有姑溪詞二卷

卜算子

我住長江頭君住長江尾日日思君不見君共飲長
江水 此水幾時休此恨何時已只願君心似我心
定不負相思意

如夢令

回首蕪城舊苑還是翠深紅淺春意已無多斜日滿

簾飛燕不見不見門掩落花庭院

清平樂

蕭蕭風葉似與更聲接欲寄明璫非爲怯夢斷蘭舟
桂楫學書但寫鴛鴦却應無那愁腸安得一雙飛
去春風芳草池塘

好事近

春到雨初晴正在小樓時節柳眼向人微笑傍闌干
堪折暮山濃淡鎖烟霏梅杏半明滅玉斝莫辭沉
醉判歸時斜月

詞綜卷六